


续编

卷五十一之六十五



中興禮書續編第五十一卷

凶禮十七

永思陵十七

奉上謚冊寶

淳熙十四年十月十二日禮部太常寺言勘會今來  
大行太上皇帝升遐依故事合修製冊寶及差官今  
具下項 一合修製冊一副寶一顆并沿冊寶法物  
乞令工部下文思院修製 一合差撰哀冊謚冊文  
官撰謚議官書哀冊謚冊文官書篆寶文官各一員  
依典故係差宰執詔依撰哀冊文官差左丞相王淮  
撰謚冊文官差右丞相周必大書哀冊文官差知樞  
密院事施師點書謚冊文官差參知政事黃洽篆寶

文官差參知政事留正撰謚議官差翰林學士洪邁  
十九日禮部太常寺言勘會今來大行太上皇帝升  
遐合修製謚冊寶并沿冊寶法物已降指揮令工部  
下文思院修製外所有哀冊已行差官書撰其合用  
哀冊一副并沿冊法物亦乞令工部下文思院一就  
修製施行詔依

十一月十三日禮部太常寺勘會將來奉上大行太  
上皇帝謚冊寶行禮今來酌合行事件下項 一謚  
冊寶降出權於祥曦殿門上設幄權行安奉俟太傅  
以下再拜訖步從至宮門合上馬騎從至德壽宮上  
外幄次權行安奉太傅以下應奉上謚冊寶行禮官  
并禮直官贊引人等各退宿齋於本司其冊寶下職

掌儀衛祇應人等並宿於冊寶幄之側所有祥曦殿  
門上并德壽宮門外合用謚冊寶幄次并幕次乞令  
臨安府同儀鸞司計會禮部太常寺釘設排辦施行  
一奉上謚冊寶於德壽殿其太傅以下行禮官并  
官僚依禮例并服常服黑帶去魚立班行事 一契  
勘今來奉上日合於殿前設謚冊寶權置位及往來  
行禮緣殿前地步隘窄今欲乞將陪位百僚依成服  
禮隨宜於殿裏外立班所有合用拜席褥等乞今臨  
安府同儀鸞司計會排辦施行 一奉上冊寶日殿  
上下各設置謚冊寶褥位乞下儀鸞司排辦施行  
一奉上謚冊寶日合用香爐匙合炭火茶盞托盤盞  
注碗湯瓶奠茶酒孟子鈔鑼盆臺等乞依例就用本

殿見今供用物件外其合用供養食茶酒果等乞下  
都大主管所行下諸司排辦施行一奉上謚冊寶行  
禮畢其冊寶并沿冊寶法物乞依禮例於德壽殿安  
奉本殿官交割收掌一奉上謚冊寶合用御封降  
真香一合一奉上謚冊寶行禮所有合用日辰乞  
從本寺關太史局選定日分申取朝廷指揮降下關  
報所屬施行一奉上謚冊寶前一日奉上謚冊寶  
太傅讀冊中書令讀寶侍中奉謚冊官奉謚寶官舉  
冊官舉寶官並常服黑帶去魚守和寧門入詣祥曦  
殿門外幕次太常寺贊引祇應人禮部職掌及儀衛  
親從官等並於殿門外隨地排立以俟進請謚冊寶  
內侍官請降謚冊寶將出祥曦殿門次引奉謚冊官

奉謚寶官於內侍處受冊寶於殿門上幄次權置定  
次禮直官贊者引太傅已下詣殿門外隨官立班再  
拜訖泥如淨值免拜或權退側身立俟有司奉迎儀衛進行  
太傅已下步從至宮門合上馬處上馬騎從至德壽  
宮門外幄次權安奉訖太傅已下退歸本司宿齋  
一奉上謚冊寶前一日太傅已下行禮官及御史臺  
閣門太常寺贊引祇應人并捧冊人及職掌各合破  
炭火燈燭幕次倚卓拜席褥依例並乞下臨安府排  
辦施行詔依  
同日又言勘會將來奉上大行太上皇帝謚冊寶行  
禮合參酌合行事件下項一奉上謚冊寶依禮  
皇帝前後殿不視事是日百司作休務假一乞令



依

二十二日禮部太常寺言勘會已降指揮大行太上皇帝升遐內書哀冊文官差知樞密院事施師默今來本官已除外任伏乞朝廷降飭別行差官詔依書哀冊文官改差知樞密院事黃洽書謚冊文官改差參知政事兼同樞密院事留正書篆寶文官改差參知政事蕭燧

二十四日禮部太常寺言勘會將來奉上大行太上皇帝謚冊寶詣德壽殿行奉上之禮合差都大主管依禮例朝廷降勅就差主管喪事官充照得已降指揮劉慶祖差充都大主管大行太上皇帝喪事詔依三月一日禮部太常寺言勘會已降指揮奉上大行

太上皇帝謚冊寶同日奉上懿節皇后改謚冊寶依禮例前三日一就奏告昊天上帝皇地祇宗廟太社太稷天慶觀報恩光孝觀太一宮各合差奏告官一員乞於侍從官內差官內宗廟乞差外班宗室正任以上充並前一日致齋至日行事畢所有應合排辦事件乞依自來奏告休例令大常寺關報所有排辦詔依

同日又言勘會已降指揮奉上大行太上皇帝謚冊寶於德壽殿行禮次奉懿節皇后改謚冊寶於本室行禮太史局選用三月九日乙巳吉詔依四日禮部太常寺言勘會將來奉上大行太上皇帝謚冊寶詣德壽殿行奉上之禮今參酌國朝山園典禮

并紹興二十九年奉 上謚冊寶差官禮例條具下項  
 一太傅率羣臣奉大行太上皇帝謚冊寶詣德壽  
 殿行奉上之禮合差攝太傅一員乞差宰臣 一奉  
 謚冊寶官一員以謚冊寶授太傅乞差宰臣 一讀  
 謚冊寶攝侍中一員乞差執政官 一讀謚冊攝中  
 書令一員乞差執政官並前一日宿齋於尚書省  
 一舉冊官二員舉寶官二員乞差禮部太常寺官並  
 前一日於本司詔依  
 六日喪事都大主管所據同判太史局荆大聲等狀  
 契勘今月九日大行太上皇帝奉謚冊寶畢合換立  
 聖神武文憲孝皇帝銘旌時宜用其日未時八刻後  
 坤時吉所有換下大行太上皇帝銘旌宜於本宮正

南偏東丙位月空方焚燒吉依得陰陽經書別無妨礙詔依

八日禮部太常寺言檢照紹興七年徽宗皇帝典故俟奉上謚號冊寶了日合稱聖文仁德顯孝皇帝祔廟畢合稱徽宗聖文仁德顯孝皇帝所有今來大行太上皇帝升遐其謚號稱呼欲依上件典故俟奉上謚號冊寶了日合稱聖神武文憲孝皇帝祔廟畢合稱高宗聖神武文憲孝皇帝候指揮下日令進奏院遍牒施行詔恭依

謚冊文

維淳熙十五年歲次戊申三月丁酉朔九日乙巳孝子嗣皇帝臣名御謹再拜稽首言曰臣聞書契之作雖



始伏羲百篇之文寶首堯帝蓋其勛足以放上世其德足以被四表功成弗處褰裳去之蕩蕩巍巍與天同大稱謂之際無得而言故其生也以堯為名其沒也以堯為號當世然之後世稱之亦惟實其實而已自時厥後載世滋久光于前聞獨我聖考恭惟大行太上皇帝有聰明之質以輔之以稽古有文思之美而將之以允恭茂實英聲挺出朱邸靖康之際裔夷亂華首提義旅入衛王室旋承父兄即真之詔勉副軍民推戴之誠受命商丘適符義祖側身修行撥亂反正殪敵外熾六師翦之羣盜內訶四征獮之遂使宗社再安華戎一視此則堯之有成功也紹興而後內治日修東觀請貢却而弗愛愛北女講好為親計之

祐陵弓箭歸自萬里慈寧驄馭就養九重事有至難以誠而濟濟然後立九廟以致孝享躬三推以勸農耕睦宗族戢干戈省刑罰薄稅斂措斯民於仁壽致萬邦之協和此則堯之光澤天下也制作禮樂開設學校三歲見帝者十有二而神亦罔不格大此取士者十有一而賢俊無或遺日聽治朝則羣公卿士服神明之斷每臨講殿則老師宿學駭折衷之言萬幾餘暇尤精八法六經諸子細書幾遍翰墨有志該括古今專門名家自謂弗及此又堯之煥乎文章也臨御三紀未嘗倦勤黃屋非心乃遜於位別宮燕處耽玩至道三受徽號之冊八歸大禮之胙歲時誕節威儀交舉二十六年殆如一日臣民有創見之歎單于

寶齋堂  
有歆羨之辭漢之櫟陽唐之大安歲月何淺制度何  
陋蓋自堯迄今三千五百有餘載始終一揆未聞若  
斯之至者也夫惟中興之烈如彼內禪之盛如此是  
宜有生文士陳篇奏頌前後以千萬計至下匹夫匹  
婦若髦若俛亦知歌詠盛德於康衢之中書之史冊  
垂之萬世蓋有不可勝紀者矣臣以匪質夙奉慈訓  
覆燾以君父之德付卑以神器之重方將養志於有  
載承顏乎無窮遽聆殂落之誥難勝喪考之痛三年  
制制固已恪行七月告期敢違舊典博稽僉論請命  
郊丘人謀天<sub>天</sub>仰對景鑠謹遣攝太傅特進左丞相  
兼提舉編修玉牒監修國史日歷提舉勅令所魯國  
公食邑一萬五千戶食實封五千七百戶王淮奉玉

冊玉寶上尊謚曰聖神武文憲孝皇帝廟號高宗伏  
惟新陟之靈在帝左右垂顧廟祐序於祖宗於萬斯  
年永祚家國嗚呼哀哉謹言

奉上謚冊寶儀

其日俟開德壽宮門陪位文武百僚入詣幕次有司  
設權置冊寶褥位於殿下東向次奉謚冊寶入德壽  
宮門太傅以下行禮官並後從至殿階下東向權置  
位置北寶南太傅以下權退歸幕次俟有司排辦畢  
備御史臺閣門太常寺分引文武百僚詣殿裏外隨  
地之宜立班定次禮直官引讀冊中書令讀寶侍中  
詣冊寶之後褥位次引舉冊舉寶官於讀冊中書令  
讀寶侍中之後立次引奉謚冊寶官詣冊寶之南東

向立次引奉上謚冊寶太傅詣殿下禱位西立定禮  
 直官贊太傅躬拜在位官皆再拜訖次引太傅升殿  
 詣香案前搯笏上香再上香三上香跪一酌茶三奠  
 酒執笏俛伏興再拜訖降階復位少立次再引太傅  
 詣殿下禱位北俛伏跪奏稱太傅臣某言奉詣謹奉  
 上大行太上皇帝謚冊寶奏訖俛伏興退復位奉謚  
 冊官詣冊案前立次舉冊官詣冊案搯笏跪舉冊匣  
 興凡舉冊禮部職掌先捧冊案升殿詣殿上香案前  
 置於禱位北向次奉謚冊官搯笏捧謚冊次引太傅  
 詣冊匣之後搯笏奉謚冊官以謚冊授太傅太傅受  
 訖奉謚冊官執笏退復位次舉冊舉行太傅捧謚冊  
 升殿至禱位北向跪奠冊匣於案上太傅執笏興少

立次引讀冊中書令升殿詣冊案之後北向立舉冊  
 官搯笏跪舉冊讀冊中書令搯笏跪讀冊訖執笏興  
 降復位舉冊官奠冊舉冊匣興職掌先捧冊案于殿  
 上稍東禱位置定舉冊官舉冊匣跪置於案上舉冊  
 官執笏興降復位初讀冊官讀冊將畢引奉謚寶官  
 詣寶案前次舉寶官搯笏跪舉寶盃興職掌先捧寶  
 案升詣殿上香案前置於禱位北向次奉謚寶官搯  
 笏捧寶盃次引太傅降階于寶盃之後搯笏次奉謚  
 寶官以寶盃授太傅太傅受訖奉謚寶官執笏退復  
 位立次舉寶官舉行太傅捧升殿至禱位北向跪奠  
 寶盃于案上太傅執笏興少退稍西禱位東向立次  
 舉寶官執笏興少立次引讀寶侍中侍殿詣寶案之

後北向立舉寶官執笏跪舉寶次讀寶侍中搢笏跪  
讀寶訖執笏興降復位立舉寶官奠寶舉寶盞興職  
掌先捧寶案於殿上稍東褥位置定舉寶官舉寶盞  
跪置於案上舉寶官執笏興降復位立次引太傅降  
復位西向立定禮直官贊太傅躬拜在位官皆再拜  
如值雨泥濘隨宜於殿次移班稍東進名班首出班  
裏外并廊上趨那立班致詞復位再拜奉慰皇太后訖退

中興禮書續編第五十二卷

凶禮十八

永思陵十八

憲節皇后改謚冊寶一

淳熙十四年十一月十九日禮部太常寺言勘會已  
降指揮懿節皇后改謚依典故合修製冊寶及差官  
今具下項 一合修製冊一副寶一顆係金并沿冊  
寶法物乞令工部下文思院修製 一合差撰謚冊  
文官書謚冊文官書篆寶文官各一員依禮例差宰  
執并合差撰謚議官一員係差翰林學士詔依撰謚  
冊文官差叅知政事黃洽書謚冊文官差知樞密院  
事施師點書寶篆文官差叅知政事兼同知樞密院

事留正撰謚議官差中書舍人兼直學士院李嶽  
同日又言勘會今來懿節皇后改謚冊寶若俟將來  
大行太上皇帝神主祔廟畢行奉上之禮緣祔廟日  
合迎奉懿節皇后神主同時升祔廟室今參酌典禮  
欲乞于奉上大行太上皇帝謚冊寶前命太傅奉懿  
節皇后改謚冊寶先行告于太廟及告于大行太上  
皇帝靈座至奉上大行太上皇帝謚寶冊日先奉大  
行太上皇帝謚冊寶于德壽殿行奉上禮畢次奉懿  
節皇后改謚冊寶於本室行禮詔依  
十二月二十八日禮部太常寺言勘奉已降指揮奉  
懿節皇后改謚冊寶告於太廟及告于大行太上皇  
帝靈座并奉上于本室行禮今條具下項 一奉懿

節皇后改謚冊寶告太廟及告於大行太上皇帝靈  
座今欲乞於奉上大行太上皇帝謚冊寶行禮前二  
日奉懿節皇后改謚冊寶先行告廟之禮次告於大  
行太上皇帝靈座 一勘會已降指揮奉上大行太  
上皇帝謚冊寶前二日奏告天地宗廟社稷宮觀所  
有今來奉上懿節皇后改謚冊寶前二日係奉改謚  
冊寶告太廟并告於大行太上皇帝靈座即與前二  
日奏告日分相妨欲乞並改用前三日一就奏告施  
行 一檢熙紹興三年昭慈獻烈皇后改謚昭慈聖  
獻皇典故只以冊寶告太廟更不改題神主所有  
今來懿節皇后改謚欲乞依上件典故只以冊寶告  
太廟更不改題神主 一合用御封降真香一十三

合十一合告太廟一合告大行太一合用白幣一十  
 一段各長一丈乞於太府寺行下佐藏庫支供一  
 合用祝文一十二首十一首述以懿節皇后改謚  
 皇后改謚告于大行一今來告太廟其太傅及行禮  
 太上皇帝靈座之意官等宿齋欲乞依例太傅讀謚冊寶官前一日宿齋  
 於太廟其餘行事官等宿齋並於太廟陪位官止至  
 日趁赴所有太廟合用幕次倚卓什物拜席褥等並  
 乞下臨安府儀鸞司釘設排辦施行一乞令入內  
 內侍省依故例專差內侍官三員掌管進請御書并  
 進改冊寶入於祥曦殿安奉至夜照管至告太廟前  
 一日降出一乞依故事候書謚冊文書冊文畢令  
 文思院修製畢本院計會入內內侍省所差內侍官

進請御訖降付本院修製畢計會所差內侍官進入  
 一奉改謚冊寶告太廟日皇帝前後殿不視事百  
 司作休務假一奉改謚冊寶告於大行太上皇帝  
 靈座合用香爐匙合炭火茶盞托盤盞注碗湯瓶奠  
 茶酒孟子鈔籙盒臺等乞依例就用本殿見今供用  
 物件外其合用供養瞻茶酒果等乞令都大主管行  
 下主管諸司排辦一告太廟并奉上改謚冊寶於  
 本室行禮各合用酒脯蠟燭禮料上香炭火等乞下  
 臨安府排辦施行一告太廟并奉上下本室行禮  
 太傅讀謚冊寶官奉謚冊寶官舉謚冊寶官奉禮郎  
 太祝太官令並服祭服外應陪位百僚並服常服吉  
 帶立班所有赴德壽殿行禮並服常服黑帶立班

一奉改謚冊寶告太廟行禮如至日值雨乞依例行  
禮官于東廊下隨宜立班陪位官乞於乞于東西兩  
廊隨宜立班并行禮時前百官待班合用幕次欲乞  
並令臨安府同儀鸞司計會御史臺閣門太常寺釘  
設排辦於行地一告太廟日合差官開令六員依禮  
例太常寺闕報入內內侍省差官施行一奉上懿  
節皇后改謚冊寶前三日降出權于祥曦殿門上設  
幄權行安奉俟太傅以下常服吉帶再拜訖步從至  
宮門台上馬處上馬騎從至太廟櫺星門外下馬太  
傅以下行禮步從至太廟南神門外幄次權行安奉訖太  
傅以下行禮官並宿于太廟幕次其冊寶下職掌等  
並宿于謚冊寶幄之側所有祥曦殿門上并太廟南

神門外各合用謚冊寶幄次并太傅以下應奉上謚  
冊寶官等並合用幕次乞用臨安府同儀鸞司計會  
禮部太常寺釘設排辦施行一奉上改謚冊寶告  
太廟并奉上改謚冊寶日其太傅已下行禮官并陪  
位文武百僚入太廟並合服常服吉帶俟行禮畢出  
太廟櫺星門合換常服黑帶所有太廟櫺星門外合  
用幕次欲乞下臨安府同儀鸞司釘設排辦施行  
一勘會將來奉改謚冊寶告於大行太上皇帝靈座  
合於行禮殿前設改謚冊寶權置位及往來行禮緣  
殿前地步隘窄今欲乞將陪位百僚依例隨宜於殿  
裡外立班所有合用拜席褥等乞令臨安府同儀鸞  
司計會排辦施行一奉上改謚冊寶告太廟并別

廟殿上下各合設置冊寶席褥并合用百官幕次拜  
席褥什物等乞下臨安府同儀鸞司排辦釘設施行  
一勘會今來奉上懿節皇后改謚冊寶於本室行  
禮合於別廟殿前設改謚冊寶權置位及往來行禮  
緣別廟殿前地步隘窄今欲乞陪位百僚隨宜於殿  
下并東廊裡外立班 一奉上改謚冊寶行禮畢其  
冊寶并沿冊寶法物依禮例於太廟奉安所冊寶殿  
安奉欲乞令本廟交割收掌詔依  
十五年二月二十日禮部太常寺言勘會已降指揮  
懿節皇后改謚內書謚冊文官差知樞密院事施師  
點今來本官已降<sup>除</sup>外任伏乞降勅別行差官 詔依  
書謚冊文官改差叅知政事兼同知樞密院事留正

書篆寶文官改差叅知政蕭燧

二十七日禮部太常寺言勘會今來懿節皇后謚號  
已降勅下今叅酌比附申請事件下項 一今來改  
謚號勅下應官司行移等依<sup>禮</sup>例候奉上改謚號冊寶  
了日合稱憲節皇后 一依已降指揮修製改謚號冊  
寶內寶文今欲依禮例以憲節皇后之寶六字為文  
詔依

三月四月禮部太常寺言勘會已降指揮奉懿節皇  
后改謚冊寶告於太廟及告於大行太上皇帝靈座  
并奉上於本室行禮今叅酌國朝山園典禮并紹興  
二十九年奉上謚冊寶禮例具下項 一太傅率百  
僚奉改謚冊寶告於太廟并告於大行太上皇帝靈



座奉上於本室合差攝太傅一員乞差宰臣 一奉  
謚冊寶官一員以謚冊寶授太傅<sup>傳</sup>乞差宰臣 一讀謚  
寶攝侍中一員乞差執政官一讀謚冊攝中書令一  
員乞差執政官 一舉冊官二員舉寶官二員乞差  
禮部太常寺官 一告太廟合差奉禮郎一員太祝  
一員內太祝兼告于大行太太官令一員兼奉禮上本  
乞差禮部太常寺官如不足乞差六曹郎官 一勘  
會將來奉上大行太上皇帝謚冊寶詣德壽殿行奉  
上之禮合差都大主管官已申乞就差主管喪事官  
充外所有懿節皇后改謚行奉上之禮亦乞就所差  
官主管施行詔依

冊文

維淳熙十五年歲次戊申三月丁酉朔七日癸卯孝  
子嗣皇帝臣<sup>御</sup>謹再拜稽首言曰伏以天人同於生  
育而地辟乎下以承天為順日月同於照臨而月生  
於西以遡日為明載稽定位之初爰及垂象之大惟  
后<sup>配</sup>帝猶陰儷陽以類相從厥則不遠肆謚者行之  
跡而名者實之賓行著乎實者雖一定而莫增謚存  
乎人者或因時而有改此禮經所謂稱也在前代莫  
由<sup>不</sup>之共惟懿節皇后姜子婉芳蔣茅襲慶儉約處已  
柔明宅心風述有齊夙和視事之奉雅歌思媚方觀  
婦順之昭遭世和平同國福祉顧思念憂勤之已至  
諒消息盈虛之有時天實為之事其適爾屬重輝於  
火德旋正位於長秋儀物一新霜露屢變何仙遊之

寢邈而駒隙之莫追雖美號嘗訂於紹興而時祀已  
祔於別室是皆權製未正彛章比者嗣皇上賓禮官  
哀議謂孝為德至自漢唐蓋以相沿而德乃世修在  
典謨惟取其盛今則即南郊而祇請紹萬世以信傳  
奕廟載成清祐斯設悼今追昔酌事從宜兼懿而言  
乃不專壹意之義取憲而易抑以示正名之常設式  
播徽音益形內治謹遣攝太傅特進<sub>左</sub>丞相兼提舉  
編修玉牒監修國史日歷提舉勅令所魯國公食邑  
一萬五千戶食實封五千七百戶王淮奉冊寶改上  
尊謚曰憲節皇后伏願英靈對越盼饗<sub>來</sub>神寧而歡  
心孚禮行而慈服見依歸有所保惠無彊謹言  
奉上改謚冊寶前二日告太廟儀

告太廟前一日奉禮郎太祝太官令宮闈令並常服  
吉帶先詣太廟幕次宿齋其奉上改謚冊寶太傅讀  
冊中書令讀寶侍中奉謚冊官舉冊官舉寶官並常  
服吉帶守和寧門入詣祥曦殿門外幕次太常寺贊  
引祇應人禮部掌職及儀衛親從官等各服色服腰  
帶並於殿門外隨地排立以俟進請改謚冊寶內侍  
官請降懿節皇后改謚冊寶將出祥曦殿門次引奉  
謚冊官奉寶冊官於內侍處受冊寶付禮部於殿門  
上幄次權置定次禮直官引太傅已下詣殿門下隨  
地立班再拜訖<sub>泥如值免兩拜或</sub>權退側身立俟有司奉迎  
儀衛進行太傅已下步從至宮門合上馬處上馬騎  
從至太廟櫺星門外下馬步從至太廟南神門外幄

次權安奉訖太傅已下應行禮官並宿齋於太廟幕  
 次其冊寶下職掌並祇應人並於冊寶幄之側幕次  
 宿衛至告太廟日文武百官並常服吉帶詣太廟幕  
 次太傅讀冊寶官奉謚冊寶官舉冊寶官奉禮院太  
祝太官令宮闈令各服祭服應陪位官並服常服  
帶吉俟有司排辦實設酒脯禮料等畢脩祠祭官引宮  
 闈令入詣殿下禱位北向再拜訖升殿就位立定次  
 御史臺閣門大常寺分引文武百僚入詣殿下北向  
 隨地之宜立班定次引奉禮郎太祝太官令於陪位  
 班之前席位北向立以西為上次引太傅讀冊寶官  
 奉謚冊寶官詣太廟南神門外冊寶幄次前隨地之  
 宜立定俟有司奉改謚冊寶入南神門太傅已下後從  
 至殿西階下東向權置位冊北寶南置定次引讀冊

中書令讀冊寶侍詣冊寶案之後東向立次引舉冊  
 舉寶官又於其後立次引舉謚冊寶官於冊寶位稍  
 南東向禱位立引太傅於殿東階下禱位西向立如  
兩冊寶于東廊上隨宜設權置位行禮官亦于東廊  
立班升降東側階陪位官于東西兩廊並隨地之宜  
 立祠祭官於殿上贊奉神主次宮闈令詣諸室奉神  
 主訖祠祭官贊奉神主訖禮直官揖太傅已下躬贊者  
 曰再拜在位官者皆再拜訖先引奉禮郎太祝太官令  
 升殿各就位立定次禮直官引太傅詣盥洗位北向  
 搯笏盥手悅手執笏詣盥洗位北向搯笏洗爵拭爵  
 以爵授執事者執笏升殿西階凡行事官祇應詣僖  
 祖室酌尊所搯笏西向跪執爵太官令北向搯笏跪  
 酌酒訖執笏與先詣次室酌尊所北向立太傅以爵

酒受執事者執笏興詣僖宗室內香案前搢笏上香  
再上香三上香跪奉禮郎西向搢笏跪奉幣太傅受  
幣奠幣奉禮郎執笏興先詣次室西向立太傅執爵  
三祭酒於茅苴奠爵執笏俛伏興出戶外少立次太  
祝東向搢笏跪讀祝文讀訖執笏興先詣次室東向  
立太傅再拜訖次詣宣祖室太祖室太宗室真宗室  
仁宗室英宗室神宗室哲宗室徽宗室欽宗室行祖  
並如上儀訖奉禮郎太祝太官各降階復立位次引  
大傅降階復位立少頃禮直官引奉謚冊官詣冊案  
前北向隨地立次引太傅詣冊匣之後東向立定次  
舉冊官搢笏跪舉冊匣興凡舉冊寶皆禮部職掌助舉職掌先俸  
冊案升詣殿上當中置於褥位次奉謚冊官西向搢

笏奉冊匣以授太傅太傅搢笏受訖奉謚冊官執笏  
退復位立次舉冊官舉行太傅捧冊匣升殿至褥位  
北向跪奠冊匣於案上舉冊官奠冊匣訖執笏興少  
立次太傅執笏興少退於褥位西向立次引讀冊中  
書令詣案後北向立舉冊官搢笏跪舉冊讀冊中書  
令搢笏跪讀冊訖執笏興降階復位立舉冊官奠冊  
舉冊匣興職掌先捧冊案降階置於褥舉冊官舉冊  
匣降階太傅後從至殿下置於案上舉冊官執笏興  
退復位俟階上讀冊將畢引奉謚寶官詣寶案前北  
向隨地立定俟太傅詣寶盃之後東向立定次舉寶  
官搢笏跪舉寶盃興執掌先捧寶案升詣殿上當中  
置褥位次奉謚寶官西向搢笏奉寶篆以授太傅太

傅搢笏授訖奉謚寶官執笏退復位立次舉寶官舉  
行太傅捧寶盃升殿至禱位北向跪奠寶盃於殿上  
舉寶官奠寶盃訖執笏與少立太傅執笏與少退於  
禱位西向立次引讀寶侍中詣寶案後北向立舉寶  
官搢笏跪舉寶讀寶侍中搢笏跪讀寶訖執笏與降  
階復位立舉寶官奠官舉寶盃與職掌先捧寶案降  
階置於禱位舉寶官舉寶盃降階太傅後從至殿下  
置於案上舉寶官執笏與退復位太傅復位立禮直  
官揖太傅以下躬贊者曰再拜在位官皆再拜祠祭  
官於殿上贊奉神主入祔室訖次引太傅奉禮郎太  
訖祠祭官贊奉神主入祔室訖次引太傅奉禮郎太  
祝太官令俱詣望瘞位北向立俟有司瘞幣訖奉冊

寶出南神門太傅已下後從至冊寶幄權安文武百  
僚以退內不係騎從冊寶官出太廟樞星門太傅已  
下行禮官並權退歸幕次換常服吉帶以次步從冊  
寶

中興禮書續編第五十三卷

凶禮十九

永思陵十九

憲節皇后改謚冊寶二

奉上改謚冊寶告於大行太上皇帝靈座

儀

其日俟告太廟行禮訖太傅已下常服吉帶俟有司  
奉改謚冊寶出幄儀衛進行太傅已下後從至太廟櫺  
星門外騎從至德壽宮門外有司捧冊寶權退歸幄  
次太傅已下下馬歸幕次換常服黑帶儀衛換紫衫  
黃帶子以俟入幄奉改謚冊寶進行太傅已下後從  
入德壽宮門至大行太上皇帝靈座殿下東向權置

位冊北寶南置定太傅已下權退歸幕次俟有司排  
辦畢備御史臺閣門太常寺分引文武百僚入詣殿  
裏外隨地之宜北向立班立次引讀冊中書令讀寶  
侍中詣冊寶案之後東向立次引舉冊舉寶官於其  
太祝又於其後立次引奉謚冊寶官於冊寶位稍東  
向褥位立次引太傅於殿下之東褥位西向立禮直  
官揖太傅躬拜在位官再拜訖次引太祝升殿就位  
立定次禮直官引太傅升殿詣大行太上皇帝香案  
前搢笏上香再上香三上香跪一酌茶三奠酒執笏  
俛伏興少立次大祝東向搢笏跪讀祝文讀訖執笏  
興太祝降階歸本班太傅再拜訖降階復位立少頃  
禮直官引奉謚冊官詣冊案前北向隨地立定次引

太傅詣冊匣之後東向立定次舉冊官搢笏跪舉冊

匣興

凡舉冊寶皆禮部職掌助舉

職掌先捧冊案升詣殿上置於

褥位次奉謚冊官西向搢笏奉冊匣以授太傅太傅

搢笏受訖奉謚冊官執笏退復位立次舉冊官舉行

太傅捧冊匣升殿至褥位北向跪奠冊匣於案上舉

冊官奠冊匣訖執笏興少立次太傅執笏興少退於

褥位西向立次引讀冊中書令詣冊案後北向立舉

冊官搢笏跪舉冊讀冊中書令搢笏跪讀冊訖執笏

興降階復位立舉冊官奠冊舉冊匣興職掌先捧冊

案降階置於褥位舉冊官舉冊匣降階太傅後從至

殿下置於案上舉冊官執笏興退復位俟殿上讀冊

將畢引奉謚寶官詣寶案前北向隨地立定俟太傅

3  
2

詣寶盃之後東向立定次舉寶官搯笏跪舉寶盃與職掌先捧寶案升詣殿上置於褥位次奉謚寶官西向搯笏奉寶盃以授太傅太傅搯笏受訖奉寶謚官執笏退復位立次舉寶官舉行太傅捧寶盃升殿至褥北向跪奠寶盃於案上舉寶官奠寶盃訖執笏與少立太傅執笏與少退復位西向立次引讀寶侍中詣寶案後北向立舉寶官搯笏跪舉寶讀寶侍中搯笏跪讀寶訖執笏與降階復位立舉寶官奠寶舉寶盃盃與執掌先捧寶案降階置於褥位舉寶官舉寶盃盃降階太傅後從至殿下置於案上舉官執笏與退復位太傅復位立禮直官揖太傅躬拜在位官皆再拜拜訖俟奉改謚冊寶進行太傅已下行禮官從後出

殿門文武百僚以次退太傅以下從至德壽宮門外有司捧冊寶權歸幄次太傅已下歸幕次換常服吉帶儀衛換色服腰帶以俟入幄奉改謚冊寶進行太傅已下騎從至樞星門下馬後從冊寶至南神門外幄次權奉安訖太傅已下並退

奉上改謚冊寶於本室儀

奉上改謚冊寶前一日太傅已下應行禮官並宿於本司至奉上行禮日文武百僚先赴德壽宮奉大行太上皇帝冊寶告於靈座如儀畢次赴太廟樞星門外幕次並常服吉帶入赴太廟幕次太傅已下行禮官並服祭服俟有司排辦畢備祠祭官引宮闈令入詣別廟殿下北向再拜訖升殿就位立定次御史臺閤門太常寺



分引太傅已下并文武百僚入詣太廟殿下北向立班定禮執官揖躬贊者曰再拜在位者皆再拜訖次引太傅讀冊寶官奉謚冊官舉冊寶官詣太廟南神門外冊寶幄次前少立御史臺閣門太常寺分引文武百僚入詣別廟殿下并東廊裏外北向隨地之宜立班定次引太官令詣殿西階下東向於舉冊舉官之後立俟有司奉改謚冊寶進行太傅已下後從至別廟殿西階下東向權置位冊北寶南置次引讀冊中書令讀寶侍中詣寶案之後禱位東向立次引舉冊舉寶官又於其後立次引奉謚冊寶官於冊寶位稍南東向禱位立次引太傅於殿東階下禱位西向立如值兩并於別廟東廊裏外隨宜立班祠祭官於殿上輦奉神主次

宮闈令奉懿節皇后神主訖祠祭官贊奉神主訖禮直官躬揖輦者曰再拜在位官皆再拜訖先引太官令升殿就位立定次禮直官引太傅詣盥洗位北向搯笏盥手幌中執笏詣爵洗位北向搯笏洗爵拭爵授執事者執笏升殿西階凡事祇應人升階詣酌尊所搯笏西向跪執爵太官令北向搯笏跪酌酒訖執笏與降階復位立太傅以爵酒授執事者執笏與詣懿節皇后室內香案前搯笏上香再上香三上香跪執爵三祭酒于茅苴奠爵執笏俛伏興出戶外再拜訖降階復位少立次再引太傅詣殿上懿節皇后室前北向禱位俛伏跪奏稱太傅臣某言奉詔謹奉上懿節皇后改懿憲節皇后謚寶奏訖伏興降階詣冊寶

之後東向立定次引奉謚冊官詣冊案前北向立次  
舉冊官搢舉跪舉冊匣與凡舉冊實禮部職掌助舉執掌先捧冊  
案升殿詣懿節皇后室前置於褥位次引奉謚冊官  
西向搢笏奉冊匣以授太傅搢笏受訖奉謚冊官執  
笏退復位立次舉冊官舉行太傅捧冊匣升殿至褥  
位北向跪奠冊匣於案上太傅執笏與少退於褥位  
西向立次舉冊官執笏與少立次引讀冊中書令詣  
冊案之後北向立舉冊官搢笏跪舉冊次讀冊中書  
令搢笏跪讀冊訖執笏與降復位立舉冊官奠冊舉  
冊匣與職掌先捧冊案於殿上稍東褥位置定舉冊  
官舉冊匣詣褥位跪置於案上舉冊官執冊與降復  
位俟讀冊將畢官讀冊將畢引奉謚寶官詣寶案前北向

立次引太傅降階於寶盃之後東向立次舉寶官搢  
笏跪舉寶盃與職掌先捧寶案升殿詣懿節皇后室  
前置於褥位次奉謚寶官西向搢笏奉寶盃以授太  
傅太傅搢笏受訖奉謚寶官執笏退復位立次舉寶  
官舉行太傅捧寶盃升殿至褥位北向跪奠寶盃于  
案上太傅執笏與少退于褥位西向立次寶舉官執  
笏與少立次引讀寶侍中升殿詣寶案之後北向立  
舉寶官搢笏跪舉寶次讀寶侍中搢笏跪讀寶訖執  
笏與降復位立奠寶官奠寶舉寶盃與職掌先捧寶  
案于殿上稍東褥位置定舉寶官舉寶盃于褥位跪  
置于案上舉官執笏與降復位立次引太傅降復位  
西向立定禮執官揖躬贊者再拜在位官皆再拜訖

祠祭官于殿上贊奉神主入祔室官闈令奉神主入  
祔室訖祠祭官贊奉神主入祔室訖文武百僚以次  
退有司以改謚冊寶并沿冊寶法物交割付太廟奉  
安所于冊寶殿安奉宰執文武百僚常服吉帶出太  
廟櫺星門外幕次常服黑帶詣文德殿門外為奉上  
大行太上皇帝謚冊寶畢進名再拜奉慰皇帝皇后  
訖退

中興禮書續編第五十四卷

凶禮二十

永思降二十

啟攢

淳熙十四年十一月十一日禮部太常寺言檢點紹  
興七年二月七日太常寺申檢會祖宗故事啟攢宮  
并梓宮發引日百僚并服初喪服乞劄下所屬施行  
後此依所申所有將來大行太上皇帝啟攢宮及發  
引日百僚所服欲乞依上件典故施行詔依  
十一月三日儀鸞司言據本司人言趙顯等申契勘  
昨排辦顯仁皇后上仙承指揮於慈寧殿東廊設素  
幄一所至禫除畢申會太常寺令本司去拆了當却

於發引之前續准本寺閱令本司依舊於慈寧殿東廊排辦素幄充發引日使用所有今來大行太上皇帝升遐承指揮令本司於凡筵之東設素幄一所依前例至禫除畢合行去拆本司今欲乞將前項素幄存留權<sub>上</sub>用青紫盒蓋充祇應車駕詣宮燒香并啟攢發引日應奉使用庶幾預期辦集不致悞事詔依例去拆候啟攢發引日依舊排辦

十五年二月十八日禮部太常寺言勘會今來攢宮覆按使副已回修奉官已行起發所有將來大行太上皇帝梓宮啟<sub>攢</sub>發引掩攢宮各合用日辰時刻欲乞下太史局預期開排選定施行詔依十九日禮部太常寺言今來啟攢發引檢照國朝祖

宗山<sub>降</sub>典禮參酌條具下項

一永昌永厚永裕陵典禮以啟攢前三日至發引日皇堂并不視事并發引日百官作休務假今欲乞依上件典禮施行 一永昌永定永裕陵典禮啟攢日羣臣具衰服序班帝服初喪之服行祭奠之禮自是羣臣日一臨<sub>上</sub>已易常服出至發引而止所有今來梓宮啟祭奠之禮文武百僚并服衰服陪位立班自是百僚每日朝一臨至發引皆如之臨退乞不易服至發引奉辭靈駕畢易常服黑帶 一永熙陵典禮靈駕發引前一日之夕晝漏未盡三刻羣臣詣萬歲殿哭臨次挽歌作及紹興二十九年禮例發引前一日總護使行夜祭之禮俟祭畢初更挽歌入殿祇應

其挽歌及祇應人如殿內別無祇應初更後並令出殿宮禁過夜不致喧雜所有將來靈駕發引前一日晝漏未盡三刻欲乞依上件典禮文武百僚詣德壽殿入臨退總護使行夜祭之禮畢初更挽歌入殿祇應訖並令出殿所有經由門戶候祇應人等出盡閉門其合用燈燭并供養茶食酒果香爐匙合器皿等乞下都下主管所行下主管諸司排辦其總護使行禮係尅擇官讀祝文并合用定時尅擇官並乞就令都大主管所尅擇官祇應一依典禮啟攢畢合進名奉慰今欲乞依禮例施行仍乞是日百司作休務假一永定陵典禮啟攢後不進刑罰文書今欲乞依上件典禮自啟攢日至發引日不進刑罰文書

一參酌山陵禮制啟攢日羣臣並服初喪服入臨奉慰照得永定陵乾興元年九月十三日禮儀院言啟攢宮後百僚並服初喪服其間軍員有近經轉補或自外代歸未曾給孝服者止以公服陪位又紹興二十九年十一月三日禮部太常寺言啟攢百僚皇親各服初喪之服契勘到部待闋文臣通直郎武臣保義郎以上合服初喪之服立班緣成服之後有不曾製孝服者止常服黑帶立班勘會淳熙十四年十月八日大行太上皇帝升遐文武百官等合服孝臨安府依已降指揮製造給散成服了當續準指揮依故事啟攢宮并梓宮發引日百僚並服初喪服竊慮百僚不知前項故事乞劄下所屬施行所有將來啟攢

并發引日文武百僚合服孝服及自外代歸并成服  
後不曾制孝服孝服常服黑帶欲乞並依前項典禮  
及已降指揮施行 一永熙陵典故禮儀使言靈駕  
發引五使下從人惟紫衫帽子諸司職掌元無喪服  
制度今請應職掌引從贊謁之人止令服本色公服  
免有紊亂所有將來大行太上皇帝靈駕發引日隨  
從靈駕諸司職掌及諸色人內元不該孝服服人欲  
乞依上件典故令服本色公裳并皂衫帽子 一今  
來合於靈座殿之東設素幄并合用拜褥乞下儀鸞  
司預先釘設排辦施行 一合用祝文二首一為述  
行太上皇帝啟贊畢梓宮還殿皇帝行祭奠燒香禮  
之意一首述以為大行太上皇帝發行前一日初更  
總護之意行夜 一合用御封降真香二合 一合用  
祭禮之意

供養牙盤食并茶酒果上香炭火香爐匙合燭燭等  
乞令都大主管所行下主管諸司排辦施行 一合  
差讀祝文官乞差史官充一行祭奠禮合差前導太  
常卿一員贊引太<sup>常</sup>卿太常博士一員乞依例差太常  
寺官充 一行祭奠禮合差掩簾侍者并進茶酒捧  
祝版執燭內侍乞下入內內侍省差官施行詔依  
二十四日太史局言將來大行太上皇帝梓官啟梓  
發引掩攢官吉日時刻即與國音別無妨礙啟攢宜  
用三月十六日壬子辰時八刻後巽時發引宜用三  
月十八日甲寅丑時八刻後艮時掩攢官宜用三月  
三十日丙寅卯時八刻後乙時並吉詔依 二十五  
日禮部太常寺言將來大行太上皇帝啟攢依典故

時前合行奏前之禮今參酌下項 一合用御封降  
真香一合 一合用祝文一首 述以大臣行太上皇帝  
告之意 一時前奏告行禮官依體例係朝廷降勅就  
差橫宮總護使行禮 一合差讀祝文官一員欲乞  
輪差太常寺官充 一奏告行禮官並讀祝文官並  
前一日致齋於本司 一合用上香炭火香爐匙合  
等乞用就本殿物件使用其合排辦供養食茶酒果  
等乞令都大主管所行下主管諸司排辦施行詔依  
二十七日禮部太常寺言檢照國朝祖宗山園陵  
典故元符三年及建中靖國元年以啟橫前三日遣  
官奏告天地宗廟社稷宮觀紹興十九年二十九年  
以發引前一日奏告行在宮觀所有廟宇及經過橋

道并十里內神祠令臨安府紹興府排辦差官祭告  
所有今來大行太上皇帝梓宮將來啟橫發引欲乞  
依上件典故於啟橫前三日奏告天地宗廟社稷宮  
觀令太常寺申請差官排辦於發引前一日令臨安  
府紹興府一面排辦香酒祝文等差官祭告逐處廟  
宇及經過橋道并十里內神祠詔依 三月九日禮  
部太常寺言勘會三月十六日啟橫依典故啟橫前  
三日奏告昊天上帝皇地祇宗廟太社太稷天慶觀  
報恩光孝觀太一宮各合差奏告官一一員並乞於  
侍從官內差內宗廟乞差南班宗室正任以上充並  
前一日赴逐處致齋至日行事詔依 同日又言勘  
會三月十三日為啟橫前三日奏告天地等處其奏

告日依禮例皇帝不視事詔依 十一日內侍任嘉  
謀傳宣閣門今月十日車駕詣德壽宮聖神文憲孝  
皇帝梓宮前行啟櫬禮宿於本宮俟十八日發引畢  
還內臣僚並赴內殿起居畢車駕自祥曦殿乘輦禁  
衛等迎駕起居應從駕臣僚免從駕還內應沿路起  
居官屬等並免起居亦免奏萬福應有合行排辦事  
件疾速施行如值雨應從駕臣僚并儀衛等並許張  
雨具

### 啟櫬儀

其日皇帝自內乘輦詣德壽宮降輦入宮應從駕臣  
帝從駕之至德壽宮啟櫬時前總護使啟櫬禮畢捧  
換初喪服以俟立啟遷梓宮還殿安奉訖禮直官引讀祝文官詣殿上香

案之西東向立次禮執官太常博士引太常卿詣幄  
前立定次御史臺閣門太常寺分引部位皇太子宰  
執文武百僚並服初喪服內不曾製孝服詣德壽宮殿  
裏外隨地之立班定皇帝服初喪之服詣幄即御  
座簾禮直官太常博士引太常卿當幄前俛伏跪奏  
稱太常卿某言請皇帝詣大行太上皇帝梓宮前行  
啟櫬祭奠之禮奏訖伏興退復位簾捲前導官前導  
皇帝出幄詣殿上褥位西向立奏請拜皇帝再拜舉  
哭在位官皆再拜俱舉哭前導官前導皇帝皇帝詣  
香案前北向立奏請皇帝上香再上香三上香跪內  
侍進茶酒奏請皇帝酌茶三奠酒俛伏興又奏請皇  
帝少立俟讀祝文官讀祝文訖皇帝哭在位官皆哭



奏請拜皇帝拜在官官皆再拜訖前導官前導皇帝  
還褥位西向立奏請拜皇帝再拜在位官皆再拜訖  
前導官前導皇帝歸御幄簾降禮直官太常博士引  
太常卿當幄前伏跪奏稱太常卿臣某言禮畢奏  
訖伏興退百官移班稍東進名班首致詞復位再拜  
奉慰皇太常次進名再拜奉慰皇帝皇后訖班退

中興禮書續編第五十五卷

凶禮二十一

永思陵二十一

鼓吹 警場挽歌

淳熙十四年十一月二十三日禮部太常寺言將來  
梓宮引條具申請事件下項 一檢照紹興十四年  
梓宮發引依禮例翰林學士中書舍人撰挽詞二十  
首緣事體至重更令文臣職官以上各撰挽詞二首  
及二十九年禮例文臣職事以上各撰二首并降赴  
太常寺教習所有將來梓宮發引各撰挽詞欲乞依  
上件禮例施行 一依國朝來故事發引前夕並沿  
路宿衛至陵所並合排設驚場所所有將來梓宮發引

前夕并沿路及至橫宮宿頓欲依故事排設警場令太常寺條具申請按習施行 一依國朝故事梓宮發引前夕并沿路導引及宿頓合用鼓吹並學士院修撰道引歌詞所有將來梓宮祭引合用導引鼓吹歌詞乞令太常寺條具合用節次申請按習施行 一檢照紹興十二年二十九年體例合差挽郎今來欲乞依此件體例差撥施行 一所用鼓吹警場挽郎依故例係五使按閱今已差總護使橋道頓遞使欲乞從總護使於發引前二日就貢院同橋道頓遞使使都大主管官并禮部太常寺官按閱詔依二十四日禮部太常寺言將來梓宮發引前夕合用警場并沿路依國朝故事導引鼓吹并撰導引之歌

詞今檢照昨徽宗皇帝顯仁皇后梓宮發引禮例申請事件下項 一警場合用金鉦一十二人鼓手六十人鳴角六十人逐色教頭共五人管轄人員三人部押使臣一員乞令殿前司差就用本司金鼓鳴角并差武嚴教頭三人合于本寺合嚴兵給內差撥今來本寺即無武嚴兵級乞令殿前司一就差曾經攝武嚴教頭內差撥前來 一鼓吹合用鼓吹令丞職掌府典史引樂官共一十人內除令丞見管外有餘名色人并乞依于本寺寺吏等內差拊祇應并合用歌色一十六人箏篋色三十人笛色三十人簫色人大鼓一十六人小鼓一十六人節鼓一名金鉦四人共用一百二十一人乞依昨紹興二十九年例令

殿前馬步三司均差今來馬軍司出戍無人差撥外  
止訖乞令殿前步軍均差棧刷會解集藝之人內選  
差識字一十六人充歌色 一鼓吹臬曲詞章合用  
黃鍾羽蕩引六州十二時三曲歌詞乞令本寺具腔  
譜申學士院修撰降下本寺教習施行 一鼓吹警  
場教習去處乞依例于本寺教習乞下臨府擬截排  
辦施行 一所有鼓吹令昨紹興二十九年係承節  
郎賀景元合服本寺紫公服鼓吹人依白身人合服  
緣公服今來鼓吹令丞并係白身人合服綠公服黑  
角帶幘頭靴職掌府典史引臬官各服緋羅寬衫執  
色臬工合服緋鷲衫平巾幘白抹帶警場三色教頭  
武嚴教頭管押人員並服緋寶相花袍小帽子白抹

帶金鉦角匠並服平巾績緋寶相花袍白絹抹帶鼓  
手黃雷花袍雷花抹額白絹抹帶并令具數下祇候  
庫閔借使用候事畢送還 一鼓吹金鉦大小鼓臬  
器欲乞于祇候庫揀選有聲韻甚好者閔請使用外  
有節一面年深損壞不堪脩飾乞下文思院計會本  
寺換造并架子杠索等應副前期教習使用其抬擎  
人兵乞令殿前司差一十人於發引前五日發遣赴  
寺 一鼓吹依禮例騎道今來經由水路合用網船  
四隻擗<sup>駕</sup>人物足脩乞下兩浙轉運司預行差撥應付  
施行 一鼓吹警場自發引沿路至橫宮逐頓合用  
麻油杓盆罐杓樺皮竹席薦紫炭之類候差到點檢  
一行事務所從寺具數關報行下逐頓排辦施行

一鼓吹做場晝在導引遇夜并番衣赴做場振作合  
 前期教習欲乞依例教習一月日詔依 十五年二  
 月二十一日禮部太常寺言將來發引今檢照故事  
 申請下項 一合用挽歌人類節級二人歌頭二人  
 唱詞十八人和聲六人執鐸和聲八人執披四人教  
 紳一人執纛一人執翼一人合用報色服著欲乞行  
 下文思院製造黑杖子二條銅鈴二十六斤連骨黃銅環全  
 銅鐸八個連骨朱紅緋一事植紅竹絲裝畫纛一事  
 連腕球腕生錢絲耀篋全彼四條翼八事帝糊油畫冠五十頂  
 白身緋袖青襖背團花歌衣五十領 一依例差押  
 教二人合服綠公服乞下祇候庫閱借 一所有挽  
 歌人乞從昨結興二十九年體例下臨安府勒令挽歌

節級拘集會解唱和之人保明差使臣管押赴寺教  
 習祇應施行如有元係挽歌見在官司之人乞牒所  
 屬抽取日下發遣事畢發還所有差充挽歌人并權  
 免諸般差役事畢依舊 一今來依例合教習一月  
 日乞于靈芝寺仍乞下靈臨安府照會擗截排辦 一  
 所差挽歌人係和顧百姓閱習唱和節次所有合破  
 日支食錢乞依禮例係殿橫發引都大主管所行下  
 諸司支費所支給自拘集到日支破事畢日往支 一  
 將來發引至櫓宮經涉水路合用二百料船二隻擇  
 人物足備乞依例下雨浙轉運司前期差撥施行詔  
 依

三月七日禮部太常寺言勘會將來梓宮發引從已

降指揮合排設鼓吹警場及所用抬擊節鼓軍兵共二百八十五人係借差殿前步軍司雜橫欃樂人充攢并職掌府典吏引樂官十人差本寺鼓吹令并人吏充攝及合用挽歌五十人押教二人內押教二人差本寺職級樂正充攝祇應并未有借請起發緣今來按行使司等處及隨從梓宮一行禁衛等并各有借請除挽歌係募召百姓無本身請給不合借請外其餘借差到殿前步軍司雜欃樂人并本司所差人吏職給樂正并各從昨紹興二十九年例借請本身請給一月候回日依條除剋詔依八日禮部太常寺言勘會將來梓宮發引今續行條具下項一檢準淳熙十四年十一月二十二日已降指揮節文

所有鼓吹警場挽郎依故例係五使按閱欲乞從總護使於發引前二日就貢院同橋道頓遞使都大主管官并禮部太常寺官按月續準今年二月二十四日指揮節文起欃用三月十六日發引用三月十八日前二日係按閱鼓吹警場挽郎緣十八日係啟欃日分又緣貢院鎖試相妨今欲乞改用三月十四日就本寺隨宜排設按閱所有合有搭蓋席屋并釘設按樂幕次椅棹什物逐官吃食等并乞下臨安府前期排辦施行一所用鼓吹做場挽郎照得鼓吹警場係在宮外排設并沿路道引其挽郎係在梓宮前拜舞唱和沿路祇應欲乞是日從總護使等官就作先次按閱鼓吹警場畢立觀按閱挽郎施行詔依

鼓吹歌詞

黃鐘羽 導引

寒日短草露朝晞仙鶴下夢雲歸大椿亭畔蒼蒼柳  
悵無由挽住天衣昭陽深院暝衣飛愁帶箭戀恩栖  
笳蕭三疊奏都人悲淚袂成堆

六州

堯傳舜盛事千古難並回龍馭舜鳳掖北內別有蓬  
瀛為子父冊鴻名萬年千歲福康寧春秋不說楚冥  
靈萊衣綵戲漢殿玉卮輕宸遊今不見烟外落霞明  
前回丁未霧塞神京正符光武中興擎天猶力扶傾  
定宗廟保山河乾坤整頓庚庚功成了脫屣遺榮訪  
崆峒空與丹庭笑把塵寰不留行吾皇哀憇血淚栖

神旌腸斷濤江渡明日稽山暮雲東望元陵

十二時

璧門雙闕轉蒼龍德壽儼祇宮軒屏正坐天子親拜  
天公儀神笏羅鴛鴦架廷中仙家懽不盡人世壽無  
窮誰知雲路玉京成就催返璇穹轉手萬緣空見說  
煙霞好處不與下方同塵合霧迷濛笙簫寨亮樓閣  
玲瓏中興大業巍巍稽古成功事去孤鴻忍聽宵柝  
晨鏡鐘靈輦駕素帷低香龍茸浙江潮萬神護川后  
滋恭因山祇事崔嵬禹穴此日重逢柏城封愁長夜  
起悲風歌清廟千古誦高宗

中興禮書續編第五十六卷

凶禮二十二

永思陵二十二

挽詞

御製五章

草昧千齡旦旆向九縣 皇天開我宗丹極下真人  
指示山河定歡呼歷數新斷鰲重立極更與物為春  
亦伏興王業巍巍四十年佛狸今送死天馬合爭  
先自壓兵車會新提造化權此疆并爾界恩德到洲  
泉 揖遜光堯德重華愧有虞居然將菲質正爾紹  
皇圖覆燾兼君父文明照典謨大恩渾未報血淚一  
未俱 不謂神仙窟今時異昔時鼎湖龍去遠社首

鳳來遲願畢三年制驚聞七月期痛心思繼代不忘  
有聲詩 夢斷堯千歲神遊五陵洛京元在望禹穴  
且相仍仗衛淒烟合簫笳凍雨凝漫磨千丈石未足  
頌中興

皇太子

昔在艱難日神開赤伏符乾坤重整頓社稷更持扶  
英武恢王業寬仁偉帝謨指疆終克復不見會都  
三紀凝天命熙然萬富春農疇迷綠野烽火靜黃塵  
內治樞機密人文禮樂新中興能事畢脫輓履付人  
真人

黃屋非心久巍巍冠百王九重崇至養八袞行休祥  
道大人天仰心閑日月長塵寰留不住終返白雲邦

鄉

鶴禁叨儲貳承恩侍祖堯孫枝元未報仙馭已成遙  
功德尊高廟威靈在紫霄山陵成指願應有百神朝

皇孫平陽郡王

寶歷開真主皇天佑我

家攘夷功廣大復自古自光華仁覆生靈遂神怡壽祉  
遐巍巍稽上古帝典又何加

至養安慈宸尊臨仰太翁重重慶方遠九九教何窮  
私抱曾門戚悲纏率土同龍輻登去路雲慘浙江東

左丞相王淮

炎祚開中業龍興自有真揮戈回日照洗甲挽天津  
立極乾坤正循環雨露新嗣皇能繼志詩為武功陳  
歷數堯咨舜美堦舜見堯三加徽號冊五日未央朝



廟祀瞻龍袞韶音遏鳳簫伏蒲思往事淚滅浙江潮

右丞相周必大

社稷中興否干戈靜四溟生年同藝祖慶壽似慈寧  
人意康庚兆天頌九九齡向來懷夏禹今祔越山青  
太極乾元父清都上帝宮宴酬忘馭駿仙去任遺弓  
音遏堯仁遠旻號舜孝隆孤臣臺閣舊血淚洒春風

知樞密院事黃洽

臨御綿三紀憂勤豈一朝披榛功迄立脫屣德彌超  
衽施重孫慶尊歸萬乘朝若將謨典較真是可光堯  
憶嘗承上諭侍宴奉堯卮笑語有餘樂從容不覺疲  
方經萸萸換遽動鼎湖悲望斷稽山塢小臣惟涕洟

叅知政事留正

內禪堯咨舜中興夏配天鴻名光寶冊奎畫動星躔  
靜享仁人壽書傳聖政篇永言天下寶胡不萬斯年  
南北休兵久仁恩及物深九齡終帝夢四海遏韶音  
聖孝高於古哀衣始自今一垓陵上土他日卜蒿吟

參知政事蕭燧

撥亂中興事艱難創業同好生天地德立極帝王功  
與子基圖永居尊福祿崇一朝違大養悽愴櫟陽宮  
畫翼排仙仗龍輜去莫攀衣冠藏漢廟弓劍闕橋山  
宇宙精神慘臣民涕泗潛堯階萸萸在無復望慈顏

兵部尚書宇文价

天啟欽明后龍飛險難中衣裳方受命已笑已平戎  
治道周家備官儀漢室隆中興凡幾見惟聖有初終

緝遜高千古規模定一朝執中親授舜傳子遠賢堯  
坐闕千年統俄虛五日朝攀髯知莫及雨泣看春潮  
宸游驚脫蕤望斷泣遺弓霜露堯階暗山陵禹穴空  
亮陰全聖孝遺容見遺風從此堯塋念惟收繼伐功  
歷數雖天定全功亘古無商宗容並駕漢祖可同符  
大與乾坤合高難日月踰鴻名終莫擬聚訟陋諸儒

翰林學士洪邁

寶歷中興運於今六十年洗光陽古日鍊補女媧天  
大業超東漢皇息暢北燕聖謨誰可頌會有筆如椽  
往在艱難際乾坤震擾中京華元有主趙魏剪為戎  
整頓須神武扶持主雋功配天還祀夏宜與少康同  
紫塞連沙漠天親隨香冥竟能襄永佑復見養慈寧

孝道光千古精誠格上靈典謨書不盡赫赫照丹青  
盛德如何說由來只是仁推心無爾界摩手為吾民  
廣大天同道高明聖與鄰欲知恩普處海岳但微塵  
禍轉亡胡歲天催五鼎亨只知江飲馬豈料觀封鯨  
士感親征詔神扶義戰兵干戈俄載戢遺恨不收京  
翼善能傳聖巍巍又見堯纜踰命知歲已禪拱宸朝  
玉冊三加俊瓊宮千閏超大章懿鏢稽古耀宗祧  
聖學由天縱煌煌翰墨場臣中羞瓘靖戶外立鍾王  
飛動鸞窺藻昭回斗避芒煥文瞻仰處傑閣在西廂  
北內神靈地期期億萬年巖廊明舜日宇寅戴堯天  
樂事湖山遍英徽雅頌傳那知開玉鎖不戀地行仙  
鶴馭臨丹極龍髯墜玉塵爐烟猶泛夜宮藻已迷春

夢斷無尋處宸遊不見人傷心天壤內血淚染車塵  
仙仗葳蕤去行行瀕水東嵇山元禹穴吳岫自堯宮  
帳殿栖寒霧笳城起暝風霓旌不可望應在采雲中

刑部尚書葛邲

身濟艱難業重開萬世基元功垂宇宙盛德遍華夷  
脫屣存尊養遺弓動孝思千秋奉高廟忍看未央卮  
奔慕天何極羨堦想見堯挽鈴傳聖作擊壤記民謠  
獨舉三年制猶存五日朝傷心神禹穴吹淚咽春潮

工部尚書韓彥質

大厯開真主群雄控六飛山河千載業天地一戎衣  
復古邊疆定銷兵聖母歸依然興禮樂文物遍郊畿  
為物聊經世本無黃屋心重明得傳器大業若遺簪

典冊褒崇極庭闈孝養深上天歸德報不使二毛侵  
八秩真希有三靈感具依鼎湖龍已遠汾水雁空飛  
羽衛愁無色風雲慘不暉惟餘功與德千古仰巍巍

戶部侍郎葉翥

啟運移天步同仁熄障烟萬方開泰日三紀中興年  
授舜河圖告尊堯玉冊鏤雲間騰鶴駕弓箭忽悲纏  
奎文琬琰在帝業典謨昭盤鬱嵇山穴淒涼前殿朝  
皇哀移縞仗終制遏簫韶笳咽春江曉千官淚送潮

刑部侍郎劉諱

威震闕河外心遊造化先華胥驚斷夢杞國痛摧天  
聖政書三紀中興立萬年傷心未央殿永夜月空圓  
日宴瞻仙仗雲深返帝鄉乾坤終一統越洛且相望

撥亂歸先帝收功屬後王聖心元有在不但見羹墻  
給事中王信

一定乾坤後干戈萬國休功成身不有思大世難酬  
雨泣龍樓曉雲騰鶴駕休傷心問耆老收淚莫能收  
音寂歌薰奏塵浮介壽觴九重舜躬孝三載服堯喪  
弓劍留無益羹墻見不忘攀髯會稽路山遠水茫茫

中書舍人兼直學士院李燾

建炎恢聖統太上極尊名夏祀忝天永克勛冠古榮  
艱難成帝業付托本皇明俯閱人間事颺遊誇九清  
壽厯開金笑皇歡奉玉顏難堪天道遠忽捨帝鄉還  
敷德戎夷外安民禮樂間功崇超大禹神穴枕稽山  
赫奕中興事洪圖久係隆垂裳三紀後脫躡再星終

靈馭龍騰座仙晨鶴翥空薰琴無盡意遺密捲悲風  
漢殿傷心地羹墻夢正勞珠藏越赤水鼎在泣烏髯  
神蒸光仍煥仁風遠更翺百王誰比得商廟獨推高  
鍊日龍翰動喧天鳳吹收橋山融露碧梧野結雲愁  
萬葉休符衍三年孝制修臣民瞻祖載痛哭蚌江流

中書舍人陳居仁

力拯艱虞運天開聖哲君赤符恢世祚蒼籙炳人文  
帝學窮源與宸奎照典墳三宗從昔躡超軼未前聞  
天步方寧止民區復晏然心非堯位樂子授舜躬賢  
揖遜高千古恬怡益萬年乘雲歸帝所溥率淚成川  
聖畧如天大仁心亘古無神兵勝淝水鳴劍罷伊吾  
宵旰逾三紀歌謠遍八區耆龐聽遺詔躡絕更嗟吁

漢日朝前殿神堯宴大安徒誇一時盛誰似兩宮歡  
謾采瀛洲葯猶餘荆鼎丹傷心浙江畔編仗自回鑿  
德壽尊慈宸怡神久北宮綵衣頻侍宴寶冊已垂鴻  
劍落橋山外陵開禹穴東從今壽文宮無復玉卮同

右諫議大夫謝諤

炎正中興日真龍應運翔山河重整頓宗社鎮安疆  
付托崑明聖優游享壽康自從遺詔下痛哭遍遐荒  
孝德高千古艱難助有神祐陵從吉壤長樂奉慈親  
三紀規模遠郡生雨露均只今陶舜治推本感堯仁

敷文閣待制張子正

身濟艱難業功收建紹時車攻修改事司隸復威儀  
南北均仁愛乾坤報壽祺徽稱高廟祐再造等鴻基

內禪光前古皇息大莫酌賓天騰霍駕問寢愴龍棲  
七月遺弓闕千巖王氣浮先臣早攀附應帶玉京遊

敷文閣待制吳琚

鴻業載多難炎圖衆復興玉卮尊壽嘏寶鼎錢徽稱  
鐘虞新文廟衣冠接禹陵聖功天廣大刻化愧難能  
浯水磨崖頌康衢擊壤詩倦勤親授受退養樂期願  
弓劍神遊遠堊墻聖子悲寢門陳素仗無復未央遺

吏部侍郎章森

歷數延周卜謳歌識啓崑照臨還日月付托重裳衣  
風雨群龍應乾坤一劍飛中天知有造大德侈重輝  
祐陵弓劍古長樂鼓鐘深仁孝由天質哀榮極帝心  
百年周禮樂萬國漢詭吟恢括成規在雲霓望到今

心已非克屋天方錫禹疇雍容三遜日燕翼萬年謀  
曉色開璇宇春聲度玉舟衮衣親舞盛事絕前疇  
帝學深千古奎文盡六經聖明更作述道德有儀型  
荆鼎如聞就虞琴不忍聽傷心對南極夜作老人星  
風露賓群羽雲雷折九關倏空塵世夢元厭紫青班  
淚落人間雨愁連海上山三年不言處古道獨今還

禮部侍郎嚴師魯

炎運重熙日人心誓不忘規模同藝祖忠厚似仁皇  
萬里衣裳信千秋揖光遜始終並失德端並陶唐  
道冠百王上功成三紀間堯遊忽汾水禹葬暫稽山  
縹緲騰仙馭滂沱慘聖顏衣冠寧久此京洛會當還  
起居郎胡晉臣

運逢陽九厄大統實親承戡定資神武艱賴中興皇  
風高揖遜徽號極推稱遠邈長生葯雲隨鶴馭昇  
五利存兼舜仁息添瀛深宮帷傳宴駕戎狄亦傷心  
介壽虛克酒纏哀入舜琴攀髯嗟莫及血淚但盈襟  
起居舍人鄭僑

聖武高千古仁恩浸八埏中興垂漢統內禪享堯年  
寶冊逾三上慈幃慶兩全黃雲擁仙鶴趣駕獨賓天  
問寢虛前殿日山仰上皇孝思濡雨露孺慕見羹墻  
禮起通喪志哀形繼伐章他年浮哭厥何處奉瑤觴  
殿中侍御史冷世光

纘服艱難後沉幾倣擾初孝心柔在衽慈殿返安輿  
牛馬聊休牧畊桑即奠居少康仍祀夏功烈竟何如

脫屣輕克禪垂裳協舜華孫謀千載下德壽八齡賒  
內閣儲奎畫孤山破漢槎鼎湖颺馭遠宮闕五雲遮  
問寢勤清蹕乘雲邈去踪羨墻深在念天日恹無容  
禹廟荒寒路稽山濕翠峯老臣心更折嗚咽涕無從  
左補闕薛叔似

烏髯成鼎後龍化渡江前湯紀扶皇極堯仁決漏泉  
修文宸慮密殞敷晚功全脫屣巍巍日光華跨古先  
衢室皇心倦西宮子職祇奉卮三世并擊筑萬年思  
雲慘嵇山暮風掀汴水悲昭哉繼文志痛念際駒馳

右拾遺許及之

鰲極思難報龍髯恨莫攀興平三紀內壽考九齡間  
遜德光千古仁心亘八寰數周將必復盍看版圖還

夷夏均哀涕空同只故仙衣冠趨禹穴雲日慘堯天  
嗣聖昭仁孝通喪振古先小臣私罔極生長中脩年

監察御史黃謙

火德興皇統天威讐獷夷重恢周境土復振漢威儀  
顯號崇堯冊耆年慶玉卮鼎成龍去遠攀慕不勝悲  
整頓乾坤後邊烽久已銷和親來北虜溫清樂東朝  
歷數躬傳舜文章煥有堯傷心會稽路仙仗綵雲遙  
監察御史吳博古

維昔天人會龍飛濟水陰赤符元受命黃屋本非心  
武定英威振文脩聖畧深煌煌中興業史冊照來今  
治定餘三紀功高寢五兵華夷均覆冒天地自生成  
顯號思推稱諸儒力請明高光徒擬議蕩蕩本難名

道與天同大名尊古有光延年高五帝捷志上三皇  
履脫重霄迥弓遺萬國傷寓菽臨禹穴終慕見堯墻  
天上宸遊遠人間帳殿移忍聞遺世詔誰續中興碑  
嗣聖三年服思陵七月期傷心越山路草木亦纏悲

中興禮書續編第五十七卷

凶禮二十三

永思陵二十三

金國使人吊祭一

淳熙十五年正月十七日尚書省言大行太上皇帝  
升遐已差告哀遣留使副奉使金國將來却有差到  
國信使副所有見辭投書應干禮儀詔令禮部御史  
台閣門太常寺預行脩定聞奏

二十三日尚書省劄子盱眙軍中丞泗州牒差定弔  
祭使副取正月二十七日過界使鎮國上將軍左宣  
徽使蒲察克副中議大夫太常少卿劉瑋讀祭文官  
朝散大夫充翰林脩撰同知制誥耶律履三節人從



六十七人上節九人中節一十四人下節四十四人  
四又  
二十四日臣僚劄子奏臣聞敵國有事相觀以兵無  
事相閑以禮中國夷狄之分有禮與無禮而已設而  
不當敵國何觀臣聞向者北方賀生辰使者至庭適  
當大行太上皇帝升遐一時倉猝靡有定論凡應對  
之詞進退之節悉勞聖慮終于不許朝見而歸深典  
禮今者賀正旦使到來陛下必欲設素幄以受書廷  
臣莫不以為疑而然禮之在彼皆恭順而不敢違唯  
是將來弔祭使到闕又與前日二使者事體不同是  
敵相視以禮之時本朝在廷之臣與弔祭使者所服  
之服所行之禮朝廷當先討論集議立為一定之制

以待之禮無倉卒之失昔先衛文帝有喪齊遣裴昭  
明之謝徒如魏弔祭欲以朝服行事魏主客曰弔有常  
禮何得以朱衣入凶庭往返數四昭明等不可且言  
齊高帝之喪魏遣李彪來弔初不素服何至今日若  
相要逼魏選學識之士成淹對曰齊不行諒陰之禮  
逾月即吉彪奉使之日齊之君臣鳴玉盈廷貂璫耀  
目獨敢以素服側其間乎今皇帝仁孝侔于有虞執  
親之喪居廬食粥豈得以此方彼昭明等詞屈請裁  
弔服遂製衣帽給之俾服以弔書之史策為不可掩  
陛下聖學高明執喪過哀起百代之曠典欲脩三年  
之制群臣扣請再三終不可奪事與前世大異他日  
弔祭在廷使者以朝服見則于禮未順以弔服見則

群臣釋服已久彼將命之人或有裴昭明之明聖朝  
安可不用成淹輩之辨論乎宜及其未至下禮部博  
議裁酌其當否不可俟臨時討論或至倉卒也昔滕  
文公行三年之喪及至葬四方來觀之顏色之戚哭  
泣之哀弔者大悅彼何為而為感動如此必有禮以  
當其心也今日弔祭之禮寔敵國相觀之急務惟陛  
下留神早下禮官討論不勝幸甚詔令禮官討論以  
聞 右檢照國朝會要乾興元年契丹祭奠弔慰使  
副並素服祭奠及朝見中書門下樞密院起居侍立  
嘉祐八年契丹祭奠弔慰使副祭奠如乾興之儀治  
平四年遼祭奠弔慰使副入奠進慰書入見如嘉祐  
之儀其前項典故止該載祭奠弔慰使副素服即不

載中書門下樞密院官所服明道二年契丹祭奠弔  
慰使副到闕文武百官兩省都知押班以下並服常  
服黑帶使副入殿祭奠并進慰書并素服昨紹興三  
十年弔祭使人到闕并常服吉帶宰執文武官并常  
服黑帶今未正旦使人到闕係在大行太上皇帝禫  
服後文武百官并黑帶今討論全國弔祭使人到闕  
如過界日見得使人服常服吉帶欲乞令接伴使副  
宛順說諭令服擊黑帶庶得合宜若依臣僚劄子內  
用元魁成淹辯之說竊緣古今人情事体不同難以  
引用謹錄奏聞伏候勅旨 弔慰使到日宰執進禮官定  
以皆用常服今大行必大奏昨顯仁時且別宮無嫌陛下  
故用常服今大行必大奏昨顯仁時且別宮無嫌陛下  
方哀經受弔臣等亦難冠裳侍立况大祥服四脚幘  
初喪固未除也

頭哀經正得中矣

同日詔令文思院製造帛祭使副讀祭文官三員各  
皂幘頭一頂紫羅服公服黑鞞角腰帶一條上中節  
二十三人各皂幘頭一頂紫素羅衫一領黑鞞角束  
帶一條內都管二人黑鞞角腰帶下節十四人各  
素皂沙帽子一頂紫紗旋襖衫一領黑鞞白銀腰帶  
一條準脩給賜

二十五日禮部太常寺言準批下儀鸞司申契丹令  
未大行太上皇帝升遐將來使人到闕行禮未審合  
與不合照應紹興三十年排辦過紫宸兩殿及殿內  
外所陳設色額等體例釘設并德壽宮殿門裏外及  
殿上兩廊蕪已絞縛席屋至几筵殿上一帶有無合

排辦絞縛釘設去處及用是何陳設拜褥等名色乞  
下禮部太常寺逐一討論分明指定一紹興三十  
年正月二十日禮部太常寺言儀鸞司狀今未全國  
帛祭使副到闕在近本司合預期排辦未合與不合  
依已排辦過正旦所用陳設等體例釘設亦未審有  
無增損更易名色今具已排辦過正旦釘設去處及  
所用陳設下項乞送禮部太常討論一殿上辟衣  
額道柱衣并從床衣子并係素黃內拽簾條鈎青色  
今討論欲依儀鸞司具到上件已排辦過名件施行  
一赴座臣僚及使副並係紫座并臺卓衣子並係  
紫素及節三人從都管座褥條子方座子亦係紫襪  
并紫拜席褥一兩朵殿及兩廊倚簷等并茶酒屋

並止用青額道其茶酒屋內偏釘衣子係用紫色契  
勦逐項儀鸞司排辦遇紫座并臺卓衣子及偏釘衣  
子並係紫色窈緣今來係弔慰使副排設即與前項  
賀正旦事體不同今討論上件顏色并乞改用青色  
一使人殿內裏外待班閣下及殿門外賜酒果幕  
次壁衣額道緣簾鈎條并係紫色其賜果酒幕次內  
席條子亦係紫襴契勦依紹興三十年正月七日已  
降指揮使人位并賜宴聚食公所并接館伴位及赤  
岸班荆館都亭驛陳設用青素壁衣額道今討論欲  
乞用素青指揮改用青素一殿門裏外百官幕次  
簾額并係紫色及青布單幕隨宜釘設今討論欲乞  
用青素及青布單子隨宜釘設行施詔依禮部太常

寺討論到事理施行今討論將來弔祭使臣到闕所  
有合用陳設等色額欲乞令儀鸞司照應前項已降  
指揮排辦施行一紹興三十年正月二十三日禮  
部太常寺言勦會將來弔祭使副到闕詣顯仁皇后  
几筵殿行奠祭禮所有几筵殿上壁衣額道等並用  
縞素其卓幃用黃色所有慈寧殿門外幕次陳設等  
項并用素色詔依禮部太常寺所申令討論將來弔  
祭使人到闕其德壽宮殿門外陳設欲比附上件指  
揮令儀鸞司將殿門裏席屋并殿上壁衣額道等並  
為縞素其殿上卓屋等用黃色所有殿門外幕次席  
屋陳設并用青色仍令本司參照紹興三十年已降  
指揮体例排辦施行詔依二月二日主管往來國信

所言契勘昨紹興三十年帛祭使人時到祭奠帛慰  
禮物係于行禮前一日抬擎赴几筵兩處排設今來  
使人合赴德壽宮行禮所有排設禮物詔令于行禮  
前一日抬擎赴德壽宮兩處排設四日文思院言契  
勘本院近準指揮令本院製造排辦帛祭使人到闕  
准備使賜使副并讀祭文官紫羅公裳上中節紫羅  
絹施襪衫并使副幞頭腰束帶帽子等本院並已製  
造了當所有公裳衣衫亦已變染物帛在院訖今計  
會得國信所稱令本院將所造生活候使人到驛臨  
時旋行比套身材頭圍展放製造本院除已將上件  
腰束帶幞頭帽子物帛等候使人到驛日咨發人將  
等前去比套展放裁造外不致闕誤申聞事又送到

主管往來國信所言已降指揮令文思院製造帛祭  
使副等素服準備給賜更令造製鞋、紅黑角腰帶五  
條紅鞋黑角束帶二十一條紅鞋銀腰帶四十四條  
令申尚書省詔並依

同日儀鸞司言契勘近準省劄禮部太常寺討論到  
將來使人到闕帛祭所有垂拱紫宸兩殿令本司照  
應紹興十三年体例殿上用黃素釘設排辦本司除  
已遵守外今契勘得昨紹興三十年使人帛祭係在  
梓宮已發引之後到闕行禮殿上并用黃素所有今  
來使人帛祭却係在未發引之前到闕行禮兼照得  
近排辦旦正使人到闕續承指揮令本司止于垂拱  
殿東楹釘設素使人見辭應奉使用了當所是見

非辦垂拱紫宸兩殿上黃素本司即未敢便行下手  
釘設詔令用素幄

同日樞密院言閣門申契勘將來弔祭使人到闕朝  
見合依例差習儀舍人閣門宣贊舍人潘師稷閣門  
看班祇候張準可以引使副及前期入驛習儀詔依

中興禮書續編第五十八卷

凶禮二十四

永思陵二十四

金國使人弔祭二

淳熙十五年二月四日禮部御史臺閣門太常寺言  
準者劄已降指揮大行太上皇帝升遐已差告哀遺  
留使副奉使金國將來却有差來國信使副所有見  
辭受書應干禮儀令禮部御史臺閣門太常寺預行  
脩定聞奏今具下項 一行祭奠禮日欲乞依禮例  
皇帝先依德壽宮粹宮前行燒香禮如宮中之儀  
一參照乾興元年典故契丹遣祭奠弔慰使副到闕  
所司預于滋福殿設神御座又于稍東設御座並施

簾以俟使副行禮及見辭紹興三十年金國遣弔祭使副到闕係于慈寧殿上設香案香茶酒果祭食等及于慈寧殿東間南向設御幄所有今來金國弔遣慰祭奠使副到闕行禮日欲乞令都大主管所行下主管事務及諸司于德壽殿上設香案香茶酒果祭食等所有朝見幄次緣德壽宮無朵殿欲乞隨地之宜令鸞儀司于東廊陳設素幄一座以俟使副並三節人從朝見其殿上并幄次依典故并令施簾一檢照明道二年八月一十七日契丹祭奠弔慰使副到闕祭奠并進慰書文武百官并詣殿門外進名奉慰及元符三年六月一日<sup>遼</sup>國發奠弔慰使副至闕祭奠入見百官進名奉慰于皇儀殿門外照得上件

奉慰典故祭緣奠日係與朔日同日文武百官奉慰昨紹興三十年二月六日弔祭人使行禮朝見畢文武百僚赴文德殿外進名奉慰今檢準淳熙十四年八月八日已降指揮禳除日山陵前朔<sup>每</sup>遇朔望群臣入臨進名奉慰所有將來人使行禮朝見如遇朔望同日依前項典故并淳熙十四年十月八日已降指揮文武百僚即合入臨奉慰如人使行禮朝不係朔望同日其文武百官即不合入臨奉慰一昨國信所具到元祐八年接伴北朝祭奠人使張元方等語錄內十一月十六日宿內溝驛十七日于距馬橋南接見國信使耶律恂副使張奉珪恂戴金冠繫皂金牒燮奉珪<sup>鞞</sup>裙腰帶鞍韉皆紫帝擺官青絡縫紫衣

上中節人皆皂鞵塗金帶下節皂鞵白銀帶紹興三十年討論上中下節所服依國信即具到典故施行令館伴使副臨時審度晚諭施行所有今來使人到闕欲乞依上件典故禮例令館伴使副臨時審度說諭施行 一昨國信所具到元祐八年祭奠館伴語錄內十二月十七日早恂等赴紫宸殿門謝射弓例物客省賜茶酒畢詣相國寺廣願塔及大殿次詣集禧觀五嶽嶽觀燒香紹興二十年討論依國信所具到上件故例除使副詣天竺燒香之類今館伴臣僚體當人使如須欲去燒香即依例施行不願亦聽從便外依故例不射弓其例物合依國信所具到令所屬依自來體例排辦宣先施賜施所有今來使人到闕

其天竺燒香之類欲乞依上件體例施行 一使副祭奠及朝見并奉辭朝辭德壽殿門外合用待班幕次及是日宰執等幕次并乞令儀鸞司計會閣門國信所訂設排辦施行 一國朝典故祭奠弔慰使副禮畢歸幕次改常服赴客省賜茶酒候人使歸館別差近上臣僚押賜御筵紹興三十年討論依上件故事施行其賜御筵等亦令所屬依例排辦施行所有今來使人到闕欲乞依上件禮例施行其客省賜茶酒乞令所屬指定施行 一昨國信所具到捧祝文中書舍人二員明道二年係差尚書司封員外郎直集賢院王舉正王皞攝紹興三年已降指揮捧祭文中書舍人各二員差葉謙亨胡沂仍時暫借紫纁準



省搭主管往來國信所狀吊祭使人到闕有北引接  
孫元安等轉出儀範二本奉聖旨劄下閤門太常寺  
依此施行照得吊祭使副讀祭文官詣靈座殿門外  
幕次以案置祭文奠書係差內侍官二員外殿門外  
捧祭文奠書案入以俟升殿捧案詣几筵前置定讀  
祭文官啟封讀祭文奠書了當其中書舍人即不曾  
奉祭文行禮所有今來祭奠使副行禮合差捧祭文  
官欲乞依紹興三十年已行禮例入令內侍省差  
內侍省官二員至日捧祭文奠書案其合用奠書案  
并案依乞下臨安府照應紹三興十年體例預行脩  
製施行 一昨國信所具到吊慰使副就驛差中使  
特賜衣服金帶銀器衣著紹興三十五年討論依前

項故例施行今來欲乞紹興三十年已行之體例施  
行 一所有祭文欲乞依紹興三十年禮例候讀祭  
文官讀訖令本殿官收掌候班退一面焚燒 一使  
副行祭奠禮其殿上侍香供茶酒贊引依禮例係太  
常寺禮直官祇應 一所有使副行禮日并奉辭日  
依禮例合入殿祇應排立人欲乞令服見今所服  
一行禮前三日欲乞依禮例令御史臺閤門太常寺  
國信所并合詣德壽殿祇應等人並於德壽宮習儀  
一紹興三十年已降指揮吊祭人使見辭訖次日  
作歇泊假所有今來使人見辭次日欲乞依上件禮  
例作歇泊假所有使人祭奠行禮并見辭儀注乞從  
合門太常寺脩定續行申請詔依

七日禮部太常寺言勘會已降指揮禱祭禮畢皇帝  
改服素紗軟脚折上巾白袍黑銀帶詣德壽宮燒香  
則于宮中服哀經行禮所有文武百官自禱除外見  
今并常服黑帶所有將來金國吊慰祭奠使副到關  
行禮見辭日欲乞依前項指揮皇帝服哀經所有宰  
執以下合服立班官並應奉官及引班人欲乞是日  
于立班時前依作小祥禮畢禮例換服布襪頭布襪  
衫腰經布袴俟班退易常服黑帶詔依  
同日閣門言今來吊祭人使到關見辭授書等今擬  
定畫一下項 一使人見辭日皇太子免赴起居見朝  
日內中起居從駕一人使德壽宮朝見日宰執使相見從正  
任管軍知閣御帶環衛官宣贊舍人已下諸司應奉

官并赴內殿起居訖從駕至德壽宮入赴殿下分立  
俟車駕入宮逐班當殿恭神兩拜訖赴殿下分東西  
相向立俟吊祭人使行祭奠禮訖除宰執知閣并當  
任管軍御帶環衛官不當已下管軍御帶環衛官不當俟從駕一人使德壽宮  
朝見館伴免起居 一俟人使行吊祭禮訖次赴素  
帷進書朝見依例免賜茶宰執已知閣當祇應宣贊  
一人使朝見日行門禁衛諸班直親從等令于德壽  
宮殿門外兩壁排立擬設免一人使朝辭日依正旦  
例垂拱殿之東楹設素幄 一人使朝辭日依正旦  
例除宰執與使合人一班起居賜茶外使相待從正  
任管軍御帶環衛官并不當祇應宣贊舍人及諸司  
祇應官并免赴 一人使朝辭日行門禁衛諸班直

親從等令於垂拱殿隔門外并殿門外兩壁排立

一人使見辭日依例提點一名同儀臺司設褥位

一人使見辭日合賜例物止抬兩廂過三節人從此餘

擔麻不入一如有未便事件乞臨時隨節施行詔依

內皇太子免從駕

十一日樞密院言國信所申契勘今來吊祭使人到

關本所依例合預行擬定排日節次事件開具申請

朝廷指揮行下以憑關報所屬排辦施行兼紹興三

十年吊祭使人到關便令北司接計會抄錄排定禮

數日分告減日起發今準省劄節文閣門狀數內人

使朝辭依正旦例垂拱殿之東楹設素幄賜茶賜例

物本所契勘使人合赴德壽殿奉辭并赴垂拱殿朝

辭即未承曾準指揮分作兩日或併用一日本所未

敢擬申排日節次兼使人并非晚到關詔令分作兩

日先赴德壽宮奉辭

同日樞密院劄子盱眙軍申照應全國吊祭使副蒲

察克劉璋讀祭文官耶律呂并三節人從于二月初

五日未時遇界到軍乞照會右劄付部禮闈牒施行

准此

十三日主管往來國信所言契勘今來吊祭使人赴

關擬武德大夫本所掌儀王舜臣等申今月六日接

伴使人在洪潭閣北引接虞用康等將到行禮儀範

一本詔令申尚書省劄下之門太寺閣門太常寺依

此施行吊使祭副以下并常服詣聖座殿門外幕次

預先計會館伴所奉立階使副并祭文官隨祭奠  
書西入祭文莫書奉立階使副并祭文官隨祭奠  
書北自西階使副祭文靈座前行立使就一拜訖隨  
書升自西階使副祭文靈座前行立使就一拜訖隨  
茶位一畢就位俱詣階下再讀祭文跪讀祭文奠  
就位一畢就位俱詣階下再讀祭文跪讀祭文奠  
宋皇帝座前奉書及傳慰于拜禱之詞右候使副下殿  
常儀祭文官隨使副入立慰于拜禱之詞右候使副下殿  
如隨使副重行設座見

十四日國信所言勘會今來吊祭使人引到闕今承  
接伴所牒已指定行程於今月十九日入國門本所  
進承已降指揮今來吊祭使人到闕應干所賜理物  
等令所屬并依紹興三十年休例教日排辦製造給  
賜兼契勘昨紹興三十年吊祭使人到闕本所元擬  
定排日節次依係一十一日後來使人到駙乞減二  
日朝辭起發今來使人合德壽殿官行禮并朝見及

赴德壽宮奉辭並赴垂拱殿朝辭本所今叅酌比擬  
到今來排日節次事件下項 二月十六日主管官  
同管伴已下赴赤岸迎接止宿十七日晚館伴令通  
事等押人馬從物遠傳語使人到赤岸十八日赤岸  
入內內侍省差官二員賜御筵酒果至晚就仁和館  
止宿十九日北郭稅亭茶酒訖候到駙就到差監官  
官一員賜被褥紗羅等館伴請使人排茶酒晚食  
二十日臨安府書送酒食閣門差官太常寺差禮直  
官就駙習說行禮並朝見儀 二十一日館伴使人  
上馬赴德壽宮殿門外幕次內次詣德壽殿大行太  
上皇帝神御座前行禮次赴素帷進書朝見依例賜  
衣帶例物畢殿門外客省幕次館伴傳旨別賜北使

副并讀祭文官例物訖次赴客省茶酒畢歸駟承受  
賜柑子或改換荔枝支圖荔枝內入內侍省差官二員  
賜御筵酒果兩府押伴 二十二日入內內侍省差  
官一員賜生餼依例折博館伴請使人依常式排當  
承受賜香葯酒果係此酒正果入內內侍省差官一員  
特賜使人衣帶例物等 二十三日入內內侍省差  
官一員賜內中酒果準脩使人已下赴天竺寺等處  
燒香排辦素食茶酒承受賜使人乳糖等小貼子稱  
紹興三十年二月一日省劄節文館辦使副洪遵等  
狀檢會元祐八年祭奠使副詣相國寺等處燒香今  
未欲依故事詣天竺寺燒香奉旨依劄付所館伴使  
人于當月初八日赴天竺寺等處燒香訖今來比擬

准脩赴天竺等處燒香更合取自朝廷指揮 二十  
四日館伴請使人依常式排當承受賜春氣尚寒酒  
果係此酒正果入內侍省使同館伴入位賜使副讀祭  
文官酒果器物香茶等 二十五日在駟入內內侍  
省差官三員內一員先入位特賜弓衣帶例物二員  
特賜筵宴酒果係此酒正果入內侍省使同館伴入位  
果子并雕花密煎時果 二十六日入內內侍省差  
官一員賜內中酒果館伴請使人依常式排當 二  
十七日客省檢賜酒食准脩使人等已下赴浙江亭  
觀亭潮排當茶酒承受賜酒果歸驛閤門太常寺差  
官習說赴德壽宮奉辭儀小貼子稱紹興三十年二  
月一日省劄節文館伴使副洪遵等狀檢照元祐八

年祭奠使副至寧祥池觀看今來觀潮事体一同欣  
依故事觀潮奉聖旨依劄付所館伴使人于當月十  
一日赴浙江觀潮訖今來比擬準備觀潮更合取自  
朝廷指揮二十八日館伴使人上馬赴德壽宮殿  
門外幕次內次詣德壽殿大行太上皇帝神御座前  
奉辭訖殿門外幕次茶酒畢歸驛館伴請使人依常  
式排當閣門差官習說朝辭儀二十九日館伴使  
人上馬入內待漏幕次茶酒入內赴垂拱殿東極素  
幄朝辭宣坐吃茶酒依賜衣帶例物訖使受國書訖  
次赴殿門外客省茶酒畢歸驛入內內侍省差官二  
員賜御筵酒果兩府押伴就差監厨官一員密賜大  
銀器臨安府書送賚儀至晚館伴請使人赴坐解換

夜筵依例勸詳館伴面授使人賜目其封進請領國  
書本所閱報學士院入內內侍省施行三十日承  
受賜使人龍鳳茶金鍍銀合并傳宣春寒候日高和  
暖行馬館伴使人上馬至北郭稅亭茶酒畢上舡至  
仁和館供晚食次赴赤岸入內侍省差官二員賜御  
筵酒果差六曹尚書押伴送館伴送伴同坐筵起館  
伴與使人相別送伴交割前去詔依

中興禮書續編第五十九卷

凶禮二十五

永思陵二十五

金國使人弔祭三

淳熙十五年二月十四日太常寺言勘會已降指揮使人祭奠行禮並見辭儀注乞從閣門太常寺脩定續行申請本寺今續行脩定使人祭奠奉辭行禮儀注下項

一祭奠前期儀鸞司於德壽殿東廊設御幄並德壽殿上並施簾其日有司預於殿上設大行太上皇帝神御座主管事務及諸司於殿上先設香案香茶酒果祭使盆臺等俟使人并讀祭文官至德壽殿門外幕次

如有使人付到祭食先皇帝先詣德

壽宮梓宮前行燒香之禮如宮中之儀畢東廊御幄  
簾降其赴起居侍立等官並如閣門儀禮直官引內  
侍官於德壽殿門外捧祭文奠書案入於殿階下使  
副拜褥之右禮直官舍人通事引使副讀祭文官並  
於殿下褥位北向立定讀祭文官重行立初行引使  
副詣德壽殿門殿上簾捲皇帝於幄內舉哭殿上下  
官皆舉哭殿使副升躬揖使副讀祭文官俱再拜訖內  
侍官奉祭文奠書案升西階詣神御座前稍西使副  
讀祭文官隨升殿使副詣殿上北向立讀祭文官在  
祭文奠書後立引使詣神御座前一拜跪三上香  
奠茶三奠酒畢就一拜興復位神侍官奉安詣讀祭  
文官降西階下殿立揖躬歸位再拜皇帝於幄舉哭

殿上禮直官舍人通事引使人並權退殿上簾  
降使人出德壽殿門外幕次以俟朝見注所有朝見儀  
面修一奉辭前期儀鸞司於德壽殿上施簾其日  
皇帝不視事有司預於殿上設大行太上皇帝神御  
座主管事務及諸司於殿上先設香案香茶酒果祭  
食盆台等并德壽宮親從親事官排定如儀俟使人  
並讀祭文官德壽宮殿門外幕次俟親從親官自拜  
兩拜訖次御史臺閣門太常寺分引宰執侍從官入  
赴當殿北向立殿上簾捲躬身兩拜訖宰執官由西  
階升殿分東西侍立侍從官於殿下東壁面西立禮  
官直舍人通事引使副讀祭文官入殿門殿上皆舉哭  
至殿下褥位北向立定揖躬身兩拜立引使副由西



塔升殿殿上官下依舊殿下立讀祭使副於殿上北向立引

使詣神位座前就一拜跪三上香奠茶三奠酒畢就

一拜興復位立引使副降西階下殿歸位立殿上舉

哭揖躬兩拜訖退宰執官降西階侍從官以上以次

退殿上簾降詔依

十五日閤門言令擬定帛祭人使到闕德壽宮素帷

朝見節次如後其日內殿入內官班俟報班立定閤

門催奏班齊皇帝先內殿坐知閤門官脩注并常服

御帶環衛官皇城司官祿衣執樞密院諸房逐房副

承指宣贊舍人以下諸司祇應官提點同提點兼祇

應并常服一班常起居訖讀奏日

次引宰執使相待從正任宗室遙郡黑并常服一班常

起居訖如宰執殿奏事退以俟從駕已降指揮皇太子

次管軍骨祿一班起居退以俟從駕俟皇帝出

祥曦殿行門禁衛等迎駕常起居皇帝自祥曦殿上

升輦至德壽宮降輦皇帝入宮行香燒禮先引管軍

知閤御帶環衛官皇城司官樞密院諸房逐房副承旨

竝宣贊舍人以下諸司祇應官并孝一班詣几筵殿

下參神兩拜訖赴帷殿下面北立次引宰執使相待

從正任宗室遙郡服并孝一班詣几筵殿下參神兩拜

訖赴殿下分東西相向立俟使人至幕次皇帝行燒

香禮如宮中之儀畢皇帝出宮入帷簾降宰執等免

次太常寺禮直官引入內官自殿門奉祭文奠書案

入殿次禮執官舍人通事引人使并讀祭文官入殿



果其御筵係宰臣押伴承受賜中歇果子并彫花密煎時果及差官特賜使副讀祭文官酒果器物香茶等二十五日入內內侍省差官一員賜內中酒果客省僉賜酒食館伴請使人依常式排當閣門太常寺差官習說赴德壽宮奉辭儀二十六日館伴使人赴德壽宮殿門外幕次內次茶酒畢歸驛依已降指揮為使人赴德壽行禮畢差官特賜使副已下金銀訖赴浙江亭觀潮排辦酒果承受賜酒果閣門差官習說朝辭儀二十七日館伴使人上馬至內門待漏幕次齍酒入內赴垂拱殿東楹素幄朝辭宣坐吃茶依例賜衣帶例物訖使人受國書次赴殿門外客省茶酒畢歸驛入內內侍省差官二員賜御筵酒

果兩府押伴就差監厨官一員密賜大銀器臨安府書送齋儀至晚館伴請使人赴坐解換在筵依例勸勸館伴面授使人賜目其封進請領國書本省閣執學士院入內內侍省施行宋會要十五年二月二十七日詔朝奉郎中書門下省檢正諸房公事京堂假朝奉大夫試禮部尚書普寧郡開國侯食邑二千戶食寔封一夫百戶賜紫金魚帶充奉使全假報州觀使義郎行在侍衛軍永平縣會官劉端仁假客州觀使義郎行在侍衛軍永平縣開國何食邑二千戶承賜使人龍鳳茶金鏡銀合并傳宣春寒候日高和暖行馬館伴使人上馬至北郭稅亭茶酒畢上舡至仁和館供晚食次赴赤岸入內內侍省差官二員賜御筵酒果差六曹尚書押伴館伴送伴同坐筵起館伴與使人相別送伴交割前去詔依

二十三日閣門言今擬定弔祭人使垂拱殿之東極  
 賜茶畢朝辭節次如後其日皇帝先本殿後幄坐知  
 閣門官已下并當祇應宣贊舍人已下合祇應諸司  
 官提點同提點兼祇應一班宣名常起居讀奏日知  
 議奏日餘官各赴殿之東極侍立祇應位如宰執有  
 奏事赴本殿後幄起居奏事不更赴殿之東極起居  
 并赴殿下東壁面西立如舍人奏班絕候殿之東極  
 无奏事更不赴后幄起居舍人奏班絕候殿之東極  
 入内官喝排立報引宰執人并讀祭文官一班于殿  
 之東極下相向立閣門奏班齊皇帝出殿外行門禁  
 衛諸班直親從等並迎駕常起居皇帝座司宰執并  
 人使合一班當殿立定讀祭文官于揖躬身喝拜  
 兩拜如宰執已赴後幄起居跪一引赴殿下東訖聽旨  
 不拜舍人揖躬身贊各就坐不要拜贊直身立分引

升殿席後相向立舍人贊就坐躬身應喏訖直身立  
 就坐茶至贊喫茶躬應喏訖直身立就坐揖笏接盞  
 喫茶訖盞却付殿侍訖出笏分引降詣面殿立定聽  
 旨不拜舍人揖躬身贊不要拜各祇候直身立分出  
 皇帝暫起儀鸞司撤生物等三俟皇帝坐如閣門已  
 萬福次舍人通事引使人并讀祭文官入面殿立定不  
 宣班揖躬身喝拜兩拜訖喝使跪受依已降指揮止  
 不兩拜訖引出次舍人通事引上中節入兩拜訖事  
 班前代再拜兩訖喝賜跪受箱止兩拜訖分出次  
 奏萬福舍人通事引下節入兩拜訖萬福再兩拜入喝賜跪  
 受如上中節儀分出次舍人通事再引使副升殿傳  
 語授書如儀訖引降階至隔門舍人更皇帝詔依

同日尚書省劄子太常寺準樞密院劄子國信所申  
已降指揮節文金國使人欲得早行減二日出門本  
所今橫併用二月二十六日使人詣德壽宮大行太  
上皇帝神御座前奉辭日宰執侍從合趨赴德壽宮  
立殿班緣同日章懿皇后忌辰文武百僚合赴景靈  
宮行香所有押班行香官今欲乞東班右丞相押班  
兩班參政同知押班外其德壽宮使人奉辭依已降  
指揮宰執侍從并赴德壽殿立班狀乞朝廷指揮施  
行右已劄下閤門御史臺國信所從所申事理施行  
外今劄付太常寺照會疾速施行

中興禮書續編第六十卷

凶禮二十六

永思陵二十六

發引一

淳熙十四年十月十一日詔大行太上皇帝攢宮總  
護使差趙伯圭橋道頓遞使差洪邁

同日礼部太常寺言大行太上皇帝陵名欲乞依典  
礼差宰臣擬撰詔差王淮

十二日翰林學士知制詔充橋道頓遞使洪邁言準  
差充大行太上皇帝攢宮橋道頓遞使所有合行事  
件欲乞并依昨戶部侍郎董莘紹興二十九年申請  
前後已得指揮施行詔依

十四日少保安德軍節度使充萬壽觀使棗陽郡王趙伯圭言準差充大行太上皇帝橫宮總護使所有應于合行事件欲乞并依昨吳益紹興二十九年前後已得指揮施施詔依

同日詔大行太上皇帝山陵橫宮已依紹興十二年永祐陵橫宮故事差總護及橋道頓逸使其禮儀鹵簿儀仗使合与不合差置可令禮部太常寺討論以聞

十六日詔發引可差知臨府韓彥質橋道頓逸使措置梓宮渡江

十七日禮部太常寺言今討論下項國朝會要乾德二年正月七日以宰臣范質為改卜安陵使翰林學

士竇儀為禮儀使部禮尚書張昭為鹵簿使御史中丞劉温叟為儀仗使皇弟開封尹為橋道頓逸使後質罷相命開封尹代為兼轄五使公事昭致事以密直學士薛居正代開寶九年永昌陵命開封府尹齊王廷美為山陵使兼橋道使翰林學士李昉為儀仗使知制誥李穆為鹵簿使侍御史知雜事雷德驥為儀仗使既而又命齊王兼充頓逸使中與禮書紹興元年四月十九日太常寺言檢照祖宗以來合置園陵等五使緣近降遺詔係權宜擇地橫殯欲乞止命大臣一員總領橫殯一行事務餘俟他日遷奉差置五使以尽推崇之意詔橫宮總護使差同知樞密院事李回橋道頓逸使差刑部尚書胡直孺候遷奉日

故依事差置五使紹興十二年九月七日禮部太常寺言將來修奉徽宗皇帝顯肅皇后懿節皇后橫宮乞差橫宮總護使禮儀橋使頓道逸使今參酌欲依昭慈聖獻皇后橫宮禮例總護使差執政官橋道頓逸使差侍從官外其禮儀使更不差官詔以總護使差樞密使孟忠厚橋道頓逸使差戶部侍郎張澄紹興二十九年十月四日詔顯仁皇后橫宮總護使差保康軍節度使開府儀同三司充萬壽觀使益吳橋道頓逸使差權戶部侍郎董革檢照祖宗典故開具在前今未大行太上皇帝升遐已降指揮應干合行事件并照昨徽宗顯仁皇后已得指揮體例施行今討論五差置五使緣有前項禮例欲依紹興元年十

二月二十九日已行礼例施行詔依

同日喪事提點支費主據主管支費申將來梓宮發引沿路排設路祭乞故例立定壓祭絹內宰相使相各五十匹侍從台諫各三十匹管軍知省知閣御帶御葯門司直殿等各二十匹六曹郎官侍監少卿監司等各一十匹所支銀絹錢合支長短脚刺乞比擬支破于料次錢等內支破節次銀絹等欲乞并依昨顯仁皇后殿橫發引體例詔依

二十六日詔大行太上皇帝橫宮事務內外諸司合

用什物器皿仰紹興府參酌紹興二十九年體例隨

宜應辦毋得過有科擾先是兩浙轉運判官鄭汝諧

為名廣行料數乞降皇榜嚴行止絕仍令總護司計料合用名件逐一開具行下使有遵守不行先期張

皇侍御中發引其應有日本府文言欠缺一色即開見錢具實和府數奏辦從閱支之既深成而殿錢未得料應付

十一月四日皇弟少傅靜江軍節度使充醴泉觀使  
息平郡王璩言臣自幼恭陪聖訓眷注日隆未有消  
埃之報臣恭閱大行太上皇帝哀訃悲踴陳請特蒙  
聖恩許臣隨班入臨仰荷皇慈俯念微臣唯是日月  
如流哀慕摧烈臣乞俟梓宮發引日躬隨編仗扶從  
以至陵所掩櫬訖恭陪祔廟之禮庶使臣心得罄哀  
悃之萬一并乞日後遇寒日節十日朔許臣前詣宮  
陵朝萬望聖慈特賜俞允詔依  
十日禮部太常寺言勘會將來大行太上皇帝梓宮  
發引今具申請下項 一依禮例太傅持節導梓宮

所有合用節一副乞下工部指揮文思院製造施行  
一將梓宮發引日合用大昇輦并龍輜欲乞依事  
令工部下文思院比附紹興十二年二十九年休例  
修製修施行 一將來梓宮發引合用黹三匹纁二  
匹贈玉一段係于櫬宮內安設所有黹纁乞下太府  
寺指揮左藏庫揀選堪好物帛充其贈玉乞令工部  
下文思院如法製造并赴太常供納 一合用盛黹  
纁帛贈玉匣床及肥鎖匙全一副乞下工部指揮文  
思院製造畢交割付喪葬作頭抬擎 一行啟奠祖  
奠遺奠之禮合用祭器乞就用本寺見管祭器使用  
外所用合用牙床三張乞下工部指揮文思院如法  
置造施行仍于發引前期赴常太寺送納并合差撥



拾擊兵士一十五人節級一名乞下步軍司差禁軍  
前期管押赴太常寺事畢發還如經由水路乞下所  
屬差撥人船施行詔依

二十二日禮部太常寺言勘會將來大行太上皇帝  
梓宮發引條具申請事件下項 一依禮例梓宮發  
引日總護使橋道頓遞使都大主管官就幄次前朝  
辭餘行事官并免所有將來梓宮發引日欲乞依上  
件禮例施行 一檢照紹興十二年二十九年禮例  
依國朝故事發引日合用鹵簿儀仗緣節目未備發  
引日權以儀衛服青紫褐衫執持儀物充代令主管  
禁衛所前期相度差撥所有今來發引日欲乞依上  
件禮例施行詔依

二十四日臣僚奏臣聞禮者國之大經可以化民厚  
俗可以分辯邪正可以懷遠折衝衝世俗之論常以  
為迂緩難行苟能信而用之則旋至而立有效今者  
國家遭罹大變慈極上賓陛下篤于喪禮哀毀踈慕  
發于天性哀麻經杖既練勿除中外臣民瞻素望仰  
无不稱頌聖孝繼以感泣豈非禮可以感民厚俗乎  
廷臣有創為稱祖之議者陛下嚴重宗廟不然其說  
与眾議之禮官據經援古以折其非眾心莫不厭服  
以為愜當豈非禮可以辯邪正乎虜使來賀陛下方  
居喪次議者皆欲陛下屈禮奪哀延見使人聖心獨  
不忍以廢哀而受慶禮虜使閱議即服委順而歸豈  
非禮懷遠折衝手較此三事信知禮有益于聖德有

補于國家如此唯是喪改制廢闕已久自漢文變古先王之制既不可服唐佞臣李義甫許敬宗輩削去國卹一篇喪紀制度蕩然莫知據依是以當倉卒變故之際凡委巷俚俗之儀釋老荒誕之說巫史淫誣之事一切遵用喪制有合七殮橫有雞枕狗杖其為不經尤甚蓋上下屢迭討論未暇既往不咎尚復何言唯是將來梓宮發引所有合行典禮合用儀物四方于焉覘禮後世于焉取則則此不可不熟講也陛下欲終三年衰經之制于宮中則虞祭之後欽奉几筵必有其所當身親之不可使近習專領也今山陵期日尚遠已失于禮不可抹之于先尚可圖之于後臣愚欲望陛下駿發德音詔儒臣禮官博採歷代凡

百喪制酌其宜于今而合于古者推而行之以興起百王之墜典不專用禮生故案之文下禮不經之事庶幾四方有所感後世有所遵依茲事体大非陛下聖孝不能與舉臣職兼禮察冒昧敢言惟陛下裁赦詔依 同日臣僚奏恭讀大行太上皇帝遺詔山陵制度務從儉約仰見太上皇帝慈儉之德根于天性雖當彌留之際猶不忍以一身之故為國家斯民費也陛下聖孝純至冠于百王思慕罔極之恩不忍以天下儉其親凡于喪制務從優厚此誠人子之至情也臣愚深惟太上皇帝躬拯斯民于兵戈之中措之治安深仁厚澤涵濡海內者三十有六年基業已定不吝大寶之位援援聖躬盛德如此苟有附于大行

寶齋堂  
之身有窈于大行之梓宮有厚于大行之宮陵者雖  
殫國家之儲積而為之亦未足以盡陛下欲報之心  
也雖竭生民之膏血而為之亦未足以盡臣民欲報  
之心也倘非有益於大行非有裨益于聖孝而徒為  
因虛費者可不深惜乎今諸使諸司等處辟置官局  
殆二百人子弟親屬交互差辟富民贓吏雜流白身  
皆廁其間道路沸騰踴為買辟各有定價或預相要  
約悉以券食犒設之類歸之所辟使長惟貪釀賞以  
莫幸進或身為守俸為朝士不顧廉恥爭先入局乞  
支知州俸給未審有何建明有何行移有何辦集而  
猥叨厚祿如此窈聞戶部畧計其數只券食錢一項  
至十二月止已當十一萬貫况山陵尚未有期日雖

數十萬未足以給券食之費一也今上下皆明知其  
冗濫然不欲裁節者豈非欲優厚于喪典以為非所  
當損歟不知此曹實俸公家之禍而為私室之利至  
安忍也至貪冒也擇其冗濫太甚者而澄汰之又何  
薄于喪典何損于聖孝乎且國家用度從來窘匱况  
今歲災旱徧及諸路而又遭此大喪自山陵廢用之  
外飢民流移又當賑濟因信往來又倍供億雖有指  
揮凡修營百費并從內庫及封樁錢物支撥不侵有  
司經常之費然內庫封樁其為生民膏血一也國家  
賴此以基為本陛下孝思特捐此以助山陵之廢費  
亦豈可不審所當用手臣愚欲望明詔大臣係取諸  
便諸司等處所辟置員數及券食犒設錢物等應干

寶齋堂  
項目付之侍從台諫公共集議量其事任煩簡為之  
搏節審其人才可以集事者與之存留以經大費以  
塞貪冒天下幸甚臣職預耳目之末迫于獻忠不避  
眾怒仰惟陛下特賜省察詔依

中興禮書續編第六十一卷

凶禮二十七

永思陵二十七

發引二

淳熙十四年十一月二十五日臣僚上言臣聞人主  
以奉先為孝人臣以體國為忠仰惟陛下自罹天變  
哀感過情臣下雖為易月之文聖躬自服三年之制  
孝道之極上通神明至于修奉山陵百費并從內帑  
之降不忍以一毫科擾于民指揮下日不獨中外臣  
庶贊嘆一詞將使夷狄聞之嚮風慕義陛下所以奉  
先者可謂至矣人臣于此能以體國為忠詎可以一  
身榮利自為謀哉臣近者伏見迎奉橫宮諸使辟差

官屬員數猥冗以至胥吏兵卒一行人眾其徒寔繁日支錢米數目浩瀚臣近于諸司糧料院取到數目權行約度每月借請新旧請給并添破等錢約五萬餘貫米五千餘石此外又有逐次犒設將來梓宮發引日嚴更警場禁衛諸班直親從親事官禮部太常寺一行諸色人眾合用錢米不在此數今來發引未有時日而諸使官屬胥徒等未施毫髮之力坐費俸錢廩粟各計萬數苟以國休為心于義豈能自安也况國家遭此变故連遣全國使命所有禮物數倍常年加以今歲旱傷江浙飢民何啻數十百萬張口待哺延望賑給雖國家帑藏之積固非一日然此非天雨而鬼輸用之無窮何以為異時緩急之備臣愚欲

望皇明洞鑒除今來修奉山陵之禮務從隆厚以彰陛下聖孝其諸使官屬胥徒於未發前諸色請給合加裁損權減一半候將來發引有日却行全支庶几朝廷有用之財不為虛費而臣下体國之義亦復何辭臣謬當言責採之公論不能自己故敢冒昧奏陳惟陛下裁幸伏候勅旨檢會十一月二十四日臣僚奏節文乞將使司等處所辟員數及券食犒設錢物等應干項目付之侍從台諫公共集議為之撙節人才可以集事者与之存留詔令有司一就詳議奏聞十二月二日喪事都大主管所言契勘將來被差官吏諸色祇應人等并支破食錢去所自十月八日支破至今僅及兩月緣即日未有發引日分所有日支

食錢進取止詔候及七十日權行住支俟發引有日  
別行取旨九日閣門言檢會令節文立春日賜臣僚  
幡勝契勘來年正月一日立春緣大行太上皇帝梓  
宮未發引所有臣僚幡勝淳熙十四年十二月八日  
進呈詔免賜

十五日禮部太常寺言檢會紹興十二年徽宗皇帝  
梓宮發引禮例梓宮經過州縣合行排祭其不係經  
由州縣即不合排祭所有將來大行太上皇帝梓宮  
發引經過州縣乞依上件禮例施行候指揮下日令  
都進奏院編牒諸施行詔依

十五年正月十五日禮部太常寺言今具國朝祖宗  
山陵故典下項永定陵乾興元年八月十二日禮儀

院言靈駕發引前有司進龍輜於延慶殿西階挽士  
退先請皇太后奉寧龍輜舉器盡哀退行事官入皇  
帝行奉寧之禮從之九月二十四日既旦帝啓奠于  
梓宮郡臣入臨升梓宮于龍輜祖奠徹步從以出正  
陽門外梓宮升輦設遣奠讀哀冊帝哭踊盡哀禮畢  
歸次皇太后詣大昇輦前奉辭侍中奏請靈駕進發  
永昭陵嘉祐八年十六日帝啓奠于梓宮臨郡臣入  
臨升梓宮于龍輜祖奠徹皇太后步哭以從出宣德  
門梓宮升輦設遣奠讀哀冊帝與皇太后奉辭還宮  
永厚陵治平四年八月八日上啓奠于梓宮百官入  
臨升梓宮于龍輜祖奠徹步哭以從出宮德門梓宮  
升輦設遣奠讀哀冊上與皇太后奉辭退宮永祐陵

紹興十二年九月十三日權禮部侍郎施珂等言檢會永定陵故事發引前有司進龍輜于延慶殿西階挽士退先請皇太后奉寧龍輜舉哭尽哀退又永厚陵故事發引日神宗皇帝与皇太后于舉前奉辭欲乞比附前項故事是日于發引時前請皇太后自內詣龍德宮梓宮前燒香舉哭奉辭退還內詔依大行太上皇帝發引所有皇帝奉辭依典禮合于德壽宮門外行遣奠之禮內皇太后奉辭去處伏乞朝廷敷奏取自施行服候指揮小貼子稱檢照禮書徽宗皇帝梓宮係于龍德宮發引行遣奠禮緣龍德宮門外地步隘窄已設皇帝御幄難以更設皇太后御幄是日于發引時前請 太后詣龍德宮燒香奉辭退還

內緣龍德宮亦係在皇城門外詔令禮官議定閱奏二十七日右監門衛大將軍沂州防禦使權知大宗正事黜不言伏觀將來大行太上皇帝梓宮發引臣職忝宗官職于恭奉本司及親賢宅南班宗室十員隨侍扶護至櫬宮禮畢日即回趨赴祔廟立班庶几少效臣子涓埃之誠臣愚欲望聖慈特降睿旨賜允施行詔依

二月一日兵部尚書兼禮部尚書宇文价等言今恭酌祖宗山陵典禮定皇太后奉辭去處具今下項一發引日子皇帝行啓奠禮前乞奏請皇太后服衰服指大行太上皇帝梓宮前舉哭行燒香奉寧之禮訖權退有司設啓奠禮饌畢次奉請皇帝服衰服

詣梓宮前行啓奠之禮訖百僚行立班行礼畢皇帝  
權歸幄百僚退先赴城外以俟奉辭聖駕次有司徹  
啓奠禮饌侍中跪請靈駕進發輦官捧擊梓宮稍前  
又請靈駕少駐奏請皇太后就德壽殿梓宮前行奉  
辭燒香之禮畢退有司設祖奠禮饌畢奏請皇帝詣  
梓宮前舉器行祖奠之禮皇太子宰執總護使皇親  
南班官行事官陪位俟行礼畢有司徹祖奠禮饌奉  
梓宮降德壽宮殿升龍輜訖皇帝舉哭從行皇太子  
總護使皇親南班官并舉哭陪從出德壽殿至宮門  
皇帝權歸幄輦官挽士奉梓宮升大舉次有司設哀  
冊及遺奠禮饌畢奏請皇帝詣大昇舉前舉哭行遣  
奠請哀冊之禮 一所有梓宮降德壽殿升龍輜出

殿門曲尺頭東至宮門外大昇舉經由去處恐有妨  
礙乞依紹興元年及二十九年禮例令都大主管所  
行下主管一行事務勒喪事作頭預期相示將妨礙  
處行下修內司同臨安府修治施行詔依



中興禮書續編第六十二卷

凶禮二十八

永思陵二十八

發引三

淳熙十五年二月三十日皇孫安慶軍節度使平陽王御名言恭親大行太上皇帝梓宮將來發引臣欲望聖慈令臣扶護至橫宮事畢即回程庶几臣子之心以尽孝誠伏乞睿旨從臣所請冒犯天威臣無任戰慄之至詔依

四日御史台言勘會將來大行太上皇帝梓宮發引其日文武百僚出城奉辭合排設文武臣路祭一座于立班處例近排設所有合用真衣綵贈冥器花果

香燭齋供道場等其所用錢欲乞依照紹興二十九年體例應文人至選人並照本身合得料錢每貫納錢三十文省于臨安府送納出給米鈔將所收到錢令本府委官排辦路祭等支使候事畢日具所收并支使過錢物報本台照會或有支費不尽錢數令臨安府一面繳納左藏庫詔依

同日礼部大常寺言勘會將來大行太上皇帝梓宮祭引經由錢塘江并錢清江事体至重欲乞依典故降御封香祝專委官嚴潔致祭今具下項 一合用祝文二首并述以為梓官渡江前期致祭告之意一錢塘江龍神一合用御封降真香二合一龍神二首 一合用酒二升鹿脯一段重四 粟一升鹿鬻位每位各合用

五合菁一束羊豕肉各二觔爇燭四條燎草一束乞從太常寺具數報臨安府紹興府排辦其礼料俟礼畢並投于江中 一合用白幣二段以熟白絹充各長一丈八尺 乞下左藏庫 給 一逐處合用行礼幕次乞下臨安府紹興府于逐江岸口絞縛釘設排辦施行 一祭告官奉礼郎太祝太官令乞輸隨從梓官礼部太常寺官充詔依

十五日閭門勘契將來大行太上皇帝梓宮發引其日文武百僚出城奉辞合排設武臣路祭一座於立班處側近排設所有合用真衣綵贈冥器花果香燭齋供道場等其所用錢物除諸軍使臣免納外乞令應武臣橫行至承信郎並照本身合得料錢數每貫

寶華堂  
納錢三十文省欲乞于臨安府送納出給米鈔內職事官以下并諸官司已排辦路祭去處更不送納將所收到錢乞令臨安府委官排辦路祭等支使候事畢日其所收到并支使過錢物申閣門照會或有支費不尽錢數令臨安府具數一面繳納左藏庫收訖衣依

同日詔皇后閣門人典字楊伶伶已下一十人將來護送大行太上皇帝梓宮至橫宮可行下所屬去處施行

同日詔差主管大內公事知尚書內省事兼提舉十閣分事信國順懿吳從善已下一十一將來護送大行太上皇帝梓宮至橫宮可行下所屬去處施行

十七日皇極右監門衛大將軍成州團練使權主奉吳王祭祀多才言恭親將來大行太上皇帝梓宮發引伏念多才恭係預南班兼係親賢宅宗室之長願乞隨從扶護至橫宮祀畢日即回趨赴附廟立班少見臣子孝哀之誠伏乞敷奏特降指揮允許施行詔依

同日喪事提點支費言據主管支費申將來梓宮發引今條具申請下項一將來發引沿路諸處有排辦路祭去處其壓祭絹今參照昨故例內皇后閣左右相使相各五十匹貴妃位郡王府侍從兩省官嗣王南班宗室安定郡王吳益王府各三十匹婕妤位二十五匹殿前司入內省都知已下都統馬軍司步

軍司各二十匹吳國長公主張韓劉岳楊等諸王府各一十五匹三省樞密院六部閣門四方館管皇城司兩浙轉運司臨安府國夫人韓宅殿前司馬軍司步軍司統制官御馬院臨安府學太武學文官百官武官百官紹興府界浙東安撫司提刑司提舉常平司紹興府蕭山縣會稽縣大宗正行司紹興府浙東總管鈐轄路分兩橫官司修奉總管都監各一十匹所有今未欲乞依昨故例支破施行并乞于支費絹內支破如或故故例內不曾該載及有未盡去處即乞從主管支費臨時相度比附支給若或官司等及各處撲集共作排一祭排辦止乞從上將一處合支絹數給散一應合支壓祭絹若行般擔沿路儀散

竊慮差互散漫不便今欲乞據經過排路祭去處合支絹所從本數前期差人抄劄至時先此給付印押關子候至宿頓去處齋執前來支請依數給散一所有今來發引沿路至橫官司支費合用銀絹欲乞從本所約度數目將帶隨行支用如支用不足據合支數日本所印押關子給付請人候回程齋執前來請領詔依

二十四日禮部太常寺言勘會將來大行太上皇帝靈駕發引依國朝山陵典禮是日皇帝行啓奠祖奠遣奠之禮今條具下項一依山園陵禮例梓宮升大昇輦內侍封鎖檢會昨徽宗皇帝梓宮發引經由水路折卸大昇輦更不封鎖今來大行太上皇帝大

昇舉發引日亦係經涉水路欲依上件禮例更不封鎖今欲乞令總護使司照應施行 一檢照昨徽宗皇帝典禮其哀冊俟有司修置畢依旧文思院收掌俟發引前一日禮部設于行宮門外冊寶幄次俟發引日行遣奠讀哀冊禮訖其哀冊陳于大昇輦之前影殿之後導引至櫬宮日交割付櫬宮都監香火官收掌于發引前一日禮部設于德壽宮門外冊寶幄次俟發引日行遣奠讀哀冊禮訖其陳列導引次序及至櫬宮交割付都監等欲乞依前項典禮施行 一今檢照昨徽宗皇帝典禮其謚冊寶于發引前一日本殿降出付禮部設于行宮門外冊寶幄次俟發引日陳列于大昇輦前哀冊之後導引至櫬宮于幄

次安設俟掩櫬宮畢却以謚冊寶導引虞主回依旧交付本殿官俟虞發畢導引虞主至太廟其謚冊寶交割付太廟奉安所收掌所有今來大行太上皇帝謚冊寶欲乞于發引前一日本殿降出付禮部設于德壽宮門外冊寶幄次俟發引日陳設導引次序及候將來導引虞主回交付本殿官及導引虞主至太廟其謚冊寶令太廟奉安所于冊寶殿安奉欲乞並依前項典禮施行 一檢照禮例逐處合用冊寶幄次依令儀寫司隨宜量地釘設并捧冊寶職掌抬擎儀衛人并就用奉上冊寶人充所有今來發引日逐處合用冊寶幄次等欲乞并依前項禮例施行 一啓奠祖奠合用祝文二首 一首述以皇帝行啓奠禮之意一首述以皇帝行祖

奠禮一合用御封降真香乞從太常寺具合用數閱  
入內內侍省預先請降一啓奠祖奠遣奠合用白  
幣三段各長一丈八尺小一丈乞令太府寺行下左藏庫支供  
一發引日行啓奠祖奠遣奠禮共合用羊豕各三口  
副羊豕各一口乞下臨安府預先收買付牛羊司入  
滌養餵供應使用及至時差宰手工匠等祇應一  
依札例發引日行啓奠祖奠遣奠并虞主回行慮祭  
及卒哭祭其合用札料酒齊等乞從太常寺具合用  
數報臨安府排辦所有合用祭器牙床并祇應人及  
般擎祭器等兵士前期具合用數并人姓名閱報所  
屬照會前一日放入排辦交割付本殿及差殿內幕  
士等抬擎鋪設事畢招出交付太常寺職掌施行

一今來排辦啓奠祖奠遣奠并九虞祭卒哭祭合用  
宰殺羊豕及饌造神食去處及合用鍋竈什物等乞  
令臨安府于德壽宮門外空閑去處量地隨宜修蓋  
席屋三間事畢去拆一合于德壽殿東廊設素幄  
施行又于德壽宮門外西向設素幄施簾并逐處行  
禮合用白羅拜褥等并乞下儀鸞司預先計至排辦  
釘設施行一將來發引日于德壽宮門外行遣奠  
之禮竊慮至日不測值雨欲乞依例札令臨安府尙  
儀鸞司計會輦官人員喪葬作頭并太常寺預先如  
法結縛幕屋仍稍高濶不致疎漏及不得妨礙龍輅  
大昇輦道路一契勘虞祭并卒哭祭其行事官祇  
應人等并合前一日致齋并合要安奉御封香祝文

大主管官按視今來欲乞依典禮施行 一檢照紹  
興二十九年禮例發引日總護使道橋頓遞使都大  
主管官于嚴正門外幄前朝辭門引揖所有今來梓  
宮發引日總護使等欲乞依上件禮例于德壽宮門  
外幄前朝辭 一恭照昨永祐陵典禮係依祖宗山  
陵典故陵靈駕發引日行遣奠禮畢除總護使并都  
大主管官合隨從外其餘行事侍中以下并先赴宿  
頓內隨從官沿陸若出陸許自執扇遇雨許披帶其  
沿路遇宿頓及至櫓宮以至掩櫓日總護使以下并  
行事侍中等及皇親應合赴官并立班上香朝脯臨  
所有將來靈駕發引日行遣奠禮畢隨從官沿路宿  
頓服哀服立班朝脯臨等欲乞并依二件典禮行施

中興禮書續編第六十三卷

凶禮二十九

永思陵二十九

發引四

淳熙十五年二月二十四日禮部太常寺言檢照昨紹  
興十二年徽宗皇帝梓宮發引行啓奠遣奠祖奠之禮  
差太傅一員後從皇帝行禮係差宰臣所有將來大行  
太上皇帝靈駕發引欲乞依禮例差太傅一員後從皇  
帝行啓奠祖奠遣奠之禮詔依差左丞相王淮  
同日又言勘會將來靈駕發引今條具下項 一依典  
禮靈駕發引前一日呈拽按視車輦方相大昇輦并一  
行儀衛僧道等係總護使同都大主管官按視今來欲

乞依典禮施行 一檢照紹興二十九年禮例發引日  
總護使橋道頓遞使都大主管官於麗正門外帳前朝  
辭閣門引揖所有今來梓宮發引日總護使等欲乞依  
上件禮例於德壽宮門外帳前朝辭 一參照昨永祐  
陵典禮係依祖宗山陵典故靈駕發引日行遣奠禮畢  
除總護使并都大主管官合隨從外其餘行事侍中以  
下并先赴宿頓內隨從官沿陸若出陸許自執扇遇雨  
許披帶其沿路遇宿頓及至橫宮以至掩橫日總護使  
已下并行事侍中等及皇親應合赴官并立班上香朝  
晡臨所有將來靈駕發引日行遣奠禮禮畢隨從官沿  
路宿頓服衰服立班朝晡臨等欲乞并依上件典禮施  
行其朝晡臨若值雨依例免拜所有朝晡臨合用香案

香爐匙合炭火供養食茶酒果等依禮例并係主管諸  
司排辦 一勘會今來靈駕發引日及皇親南班官俟  
行啟奠祖奠陪位訖後從梓宮升大昇輦俟行遣奠陪  
位訖先退詣宿頓內不係隨從梓宮南班官至梓宮頓  
宿處以俟奉辭訖退 一永定陵典禮山陵使已下至  
永安并依至道故事更不朝拜三陵昨紹興二十九年  
禮例緣橫宮橫相去不遠總護使并陵從梓宮行事等  
官候事畢日易常服黑帶詣昭慈聖獻皇后橫宮永祐  
陵橫宮朝拜今來總護使及隨從梓宮行事等官朝拜  
欲乞依紹興二十九年禮例施行 一將來梓宮徽宗  
皇帝橫宮顯恭皇后御容顯肅發引至橫宮依禮例前  
一日奏告昭慈聖獻皇后橫宮徽宗皇帝橫宮顯恭皇



后御容顯肅皇后橫宮顯仁皇后橫宮懿節皇后橫宮其奏告官乞依例係總護使司行下大宗正司差紹興府宗室六員前一日赴泰寧寺致齋所有合用御封香祝文乞從太常寺依例具合用數關報所屬預先請降付兩橫宮司交割其合差太祝六員并合用供養食茶酒果物件等乞從太常寺報紹興府差官及以自來奏告禮例排辦施行 一沿路朝晡臨合用御封降真香一十合 一合用祭器乞用太常寺見管祭器具合用數津發前去使用詔依

二十八日特進左丞相王淮言奉勅差臣撰大行太上皇帝陵名者伏以履運中天夙紹開於帝統涓辰復土茲永奠於神靈恭上嘉名式循故寔恭惟大行太上皇

帝道同覆載明合照臨撫御寰區既濟艱難之業親傳聖嗣載高詒燕之謀緬惟弓劍之藏優若羹墻之見不改其列彰夏禹之計功永言厥思表武王之繼志大行太上皇帝陵名復請為永思陵詔恭依

三十日禮部太常寺言勘會將來梓宮發引今檢照國朝山陵典禮下項 一依典禮發引日群臣編素出順天門詣板橋立班奉辭候靈駕至皆舉哭再拜奉辭畢退改常服赴西上閤門及內東門進名奉慰所有將來發引日文武百僚服孝服出郡城立班奉辭大行太上皇帝靈駕欲乞并依上件典禮施行俟奉辭畢易常服黑帶詣德壽宮進名奉慰皇太后次詣文德殿門外進名奉慰皇帝皇后及依禮例次日作歌泊休務假 一

依典禮虞主至京群臣常服出城至板橋立班奉迎所有將來虞主回日文武百僚常服黑帶出都城立班奉迎欲乞依典禮施行 一奉辭靈駕奉迎虞主合用香案香爐匙合炭火等并合用幕次並乞下臨安府預先差人排辦量地絞縛釘設若值雨濕潤乞令就幕次立班詔依

三月一日禮部太常寺言勘會將來梓宮發引今條具下項 一梓宮發引至紹興依已降指揮本府於城外迎奉梓宮處排祭一座外今照得故例本府合於報恩光孝觀作道場三晝夜今欲乞依故例施行 一檢照故例梓宮發引經由州縣除公吏軍民不合製服外其見任寄居官曾服孝服者服初喪服不曾製孝服官止

服公服黑帶於城外排祭處俟梓宮將至長吏以下並再拜訖班首詣香案前三上香說一酌茶三奠酒俛伏興復位並舉哭俟哭止再拜訖直身立俟梓宮過班退詔依

同日又言勘會將來梓宮發引今條具下項 一所有將來致祭錢塘江其行事官四員已降指揮係差隨從梓宮禮部太常寺官充如員數不足欲乞令太常寺輪請隨從梓宮行事官充 一太常寺係掌行排辦沿路應合行事務所有行移催促合用印記欲乞於禮部時暫闕借奉使印一面行使事畢送納 一梓宮發引至橫宮行遷奠掩橫宮并虞祭之禮所有御封香御書祝文祝禮料祭器牙床等并合預先排辦齋擎渡江前去

橫宮欲乞依紹興二十九年體例合差般擊兵士三十人內節級一名下步軍司差禁軍充發引前十日到寺入門事畢日發遣每人日支食錢二百文米二升半令步軍司申戶部行下糧料院出給券歷批勘一月於左藏庫支給內米於紹興府諸頓支請施行并合用收盛御香祝文禮料等籠擔五付乞下臨安府收買赴太常寺使用 一太常寺所差行遣文字并贊引祇應贊者一十人并供應香槃祭器實設等供官五人並未有借請起發今欲乞依紹興二十九年體例并各借本身請給一月詔依

五日禮部太常寺言勘會將來靈駕發引是日皇帝行啓奠祖奠遣奠之禮今具差官下項 侍中一員奏請

靈駕升降進發權駐依禮例係差禮部長貳太常少卿一員帥執翼者障梓宮監察御史一員監掩橫宮少府監一員進龍輜將作監一員捧梓宮登龍輜兼掩橫宮太常卿一員充六虞祭及掩梓宮饗官啓奠祖奠讀祝文官一員遣奠讀哀用官一員遣奠舉用官二員進幣爵酒一員酌酒官一員詔依

同日詔將來大行太上皇帝梓宮發引前一日呈拽依紹興二十九年例免

同日詔差參知政事蕭燧充大行太上皇帝橫宮禮儀使同日禮部太常寺言勘會將來大行太上皇帝靈駕發引并至永思陵橫宮合差官下項 太傅一員持節導梓宮監掩橫宮少傅一員帥捧梓宮官奉升大昇輦

又引梓宮即橫宮并攝少保復土九鍾詔太傅就差總  
護使伯圭少傅就差禮儀使蕭燧

七日兵部尚書兼禮部尚書宇文价太常少卿尤袤言  
準差充大行太上皇帝梓宮發引前路充攝行事欲乞  
依紹興二十九年體例各廳見破人從等合行將帶前  
去內書表司廩子親隨各日支食錢二百文親事官茶  
酒司厨子兵士各日支食錢二百文米二升半欲乞支  
給二十日仍各借請一月候回日依條剋除及殿前司  
各差破乘騎鞍<sub>馬</sub>一匹控馬人全事畢發遣其控馬人兵  
日支食錢欲乞依兵士例支破并令糧料院出給券歷  
批勘於左藏庫支給所有米并草料於紹興府諸頓支  
請施行詔依

八日詔永思陵橫宮都監差內侍鄺安民內外巡檢差  
閤門宣贊舍人杜錫

同日禮部太常寺言勘會已降指揮三月十八日聖神  
文武憲孝皇帝梓宮發引行啓奠禮畢文武百僚并先  
赴城外以俟秦辭靈駕所有行遣奠禮畢皇帝歸幄以  
俟還內臣僚合行從駕今欲乞是日內管軍及應奉官  
俟行遣奠禮畢就大昇輦前奉辭訖易常服黑帶以俟  
從駕還內其文武百僚依已降指揮並赴城外奉辭詔  
依

同日又言勘會將來聖神武文憲孝皇帝梓宮發引日  
合行事件除已申請外今續檢照顯仁皇后梓宮發引  
故事條具下項 一檢照紹興二十九年體例應差充

上路行事侍中等官並乞令戶部下所屬支破本等驛券所有今來聖神武文憲孝皇帝發引行事侍中等官欲乞依上件體例出給本等驛券於左藏庫支給施行

一檢照紹興二十九年體例抬擎用寶援衛輦官親事官天街仗司各破錢米每日支食錢三百文米二升半合自出日起支入門日住支其所遣人依例借請一月並於所屬出歷批勘所有今來聖神武文憲孝皇帝梓宮發引抬擎用寶援衛輦官親事官天武街仗司合破錢米支破二十日并借請一月欲乞所屬出給券歷行下左藏庫支給米於紹興府逐頓批勘施行候回日依條除尅一據御厨牛羊司祁寶等狀差撥隨逐梓宮發引沿路虞祭宰殺牲牢及饌造神食祇應即無日

逐添支食錢亦無口券借請乞下所屬支給食錢口券施行本寺契勘御厨工匠三人牛羊司宰手秤子四人欲乞依兵士體例各人每日支食錢二百文米二升半乞支破二十日仍借請一月於所屬出給券歷錢乞行下左藏庫支給米乞於紹興府逐頓批勘施行回日依條除尅詔依

中興禮書續編第六十四卷

凶禮三十

永思陵三十

發引五

淳熙十五年三月十一日禮部太常寺言將來聖神武  
文憲孝皇帝靈駕發引并至永思陵橫宮合差少傳一  
員帥捧梓宮官舉升大昇輦又引梓宮即橫宮少保一  
員復土九挿詔攝少傅改差總護使趙伯圭攝少保依  
就差禮儀使蕭燧

同日兵部尚書兼禮部尚書宇文价等言檢照國朝永  
熙陵至道八年八月三十日禮儀使言未廢發引前皇  
帝行啓奠之禮百官立班今緣其日甲時發引群臣赴

內廷立班不及又內中難以止宿望令除啓奠行禮公卿宿於內中餘官并止赴乾元門前幕次至時候謁靈駕從之勘會今來聖神武文憲孝皇帝梓宮發引已降指揮用三月十八日丑時八刻後良時依儀行啓奠禮文武百僚立班訖先赴城外奉辭照得今來發引係用良時又在甲時之時又緣大昇舉龍輜車並在德壽宮前排設委是窄隘壅遏今欲乞依前項國朝典故除啓奠行奠皇太子太傅宰執總護使皇親行事侍中以下前導等官下餘文武百僚并免啓奠立班徑赴城外以俟奉辭靈駕詔依

同日尚書省言聖神武文憲孝皇帝靈駕發引在即檢會永熙陵典故至道三年四月差山陵等五使外九月

十四日命宰臣呂端攝太尉

即令之太傅

持節導靈駕至山

陵及奠謚用謚寶監鎖皇堂詔攝太傅持節導靈駕又奠謚用謚寶監掩橫宮差右丞相周必大

同日敷文閣直學士提舉隆興府萬壽宮韓彥直言今月十八日聖神武文憲孝皇帝梓宮發引凡在臣子肝胆分裂矧彥直受國厚恩擗踊無地緣彥直見係外祠所有赴臨欲望朝廷特賜赴奏許彥直赴少伸號天扣地哀痛隕越之情詔依

十三日尚書省劄子新除太府少卿韋璞狀昨任匠作監兼權太府少卿準差充大行太上皇帝靈駕發引將作監捧梓宮登龍輜兼掩橫宮今來改除上件差遣未審合與不合前去候指揮太常寺勘會今來本官正除

太府少卿若依元降指揮止令本官充攝將作監行事  
即無妨礙右已劄下新除太府韋少卿照會外今劄付  
太常寺照會準此

同日尚書省劄子新除樞密院檢詳諸房文字范嗣彝  
狀昨任軍器監準差充太行太上皇帝靈駕發引攝少  
府監進龍輜今來改除上件差遣未審合與不合前去  
候指揮太常寺勘會今來本官改除樞密院檢詳諸房  
文字若依元降指揮止令本官充攝少府監此事即無  
妨礙右已劄下范檢請照會施行外今劄付太常寺照  
會準此

十四日太常寺言準省劄參知政事蕭燧言準差充聖  
神武文憲孝皇帝橫宮禮儀使就差攝少保行事所有

梓宮進發至永思陵橫宮沿路頓遞去處及掩橫了畢  
合行禮儀下太常寺條具施行今條具下項 一發引  
日皇帝行啓奠祖奠遣奠之禮所有禮儀使即合陪正  
俟禮畢依總護使已得指揮禮例於德壽宮門外帳前  
朝辭令閣門一就引依 一照得梓宮發引其行事官  
并於梓宮之前行船所有禮例儀使係就差少保行事  
亦合於梓宮之前行船 一沿路及至橫宮總護使以  
下合立班朝晡臨所有禮儀使立班去班處欲乞於太  
傳之後立班 一掩橫宮日時前總護使行遷奠之禮  
所有禮儀使即合陪位訖俟掩橫宮畢攝少保復土九  
鍾訖詣獻殿下立班奉辭訖退換常服黑帶 一勘會  
已降指揮俟將來掩橫宮畢依禮例差太常少卿迎奉



聖神武文憲孝皇帝御容詣永思陵下宮前殿行奉安禮今來事體至重兼已差禮儀使所有是日迎奉御容行奉安燒香之禮自合禮儀使奉迎赴永思陵下宮前殿行奉安禮詔依

十七日兵部尚書兼橫宮儀仗鹵簿使職事宇文价言勘會今來聖神武文憲孝皇帝梓宮發引沿路至橫宮導引前連後次執擎儀物禁衛等臣取索合排辦去處編排次圖本外乞行下應合屬去處至日導引不得攙先喧鬧詔依

哀用文

維淳熙十四年歲次丁未十月戊辰朔八日乙亥聖神武文憲孝皇帝崩于德壽宮之德壽殿旋殯于殿之西

階粵明年三月丁酉朔三十日丙寅遷座于永思陵橫宮禮也堯喪三年周葬七月蕞塗既撤廡車將發孝子嗣皇帝臣御名感形霜露幕見羹墻望陵陌之鬱鬱攀嬰柳以皇皇肆念啓佑無忘答揚詔近臣以寫哀書大用以圖芳其辭曰宋受天命世有明禋藝祖創業寰區底定赫赫巍巍重熙累盛入廟稱宗則篤其慶歷運元疆危惟陽九極傾孰立維絕孰紐於穆至神寔天所授勇智正邦聰明作后乾初在潛其仁淵淵草昧經綸應變中權軍車往使疆寇氣讐建旗一呼四方雲合赫矣睠顧叢然瑞謀其永命于新邑益增光于大業迺從康邸立號商丘還祀夏之鍾虞慰思漢之吟謳既荅明靈爰誅畔渙王旅風行神机電斷觀廣宇之肅清信穹

之廬之懾憚迨驚奔於霍咳復綏懷於獸散威靈既暢  
孝感亦昭旋駟駕於北闕奉寶用於東朝愛兼南朔誠  
格卑高邊城緩帶以咽哺比室滌漉而時膏爛鈎鈐而  
在轄沈貫索以空牢乃闢賢士之闕乃開群王之府躬  
龍券之勝服幸輦飛之新宇白虎陳奠於元會葱牯服  
軌於千畝蝟復興於文化夏追參於隆古御圖三紀冠  
德百王七謂款於圓丘五將饗於明堂想靈旂之颯沓  
歆至治之馨香功已極於出寧心不忘乎退藏濬發淵  
衷從容內蟬脫屣嵩崇高頤神聞燕付託得人而無憂  
謙靜應福而增衍疊申大慶亘古所無加上鴻名與天  
為徒帝真與於九齡神何止於三呼黃金以就白雲可  
乘鶴駕紛紛兮并迎仙馭忽兮飛昇嗚乎哀哉凍雨凝廡

朔風慘悽暝烟橫兮如織短日澹其無輝充黃庭兮列  
仙燾閒清宮兮張總惟荆鼎龍遙謾攀髯而仰望昭陽  
鳥在忍帶箭以低飛嗚呼哀哉塔奠屢改隙駟若馳因  
山協兆甫窳告期背象闕兮前雞唱紛吉伏兮雜凶儀  
龍動分引輶魚躍兮拂池哀若哀兮瞻宵載以設祖痛  
莫痛兮望晨輻而永違嗚呼哀哉朝太廟以右轉濟大  
而橫絕地千巖兮勢勝形萬馬兮天設往駐蹕兮虞巡  
茲藏劍兮禹六嗚呼哀哉事循聖志禮用官橫無飾金  
兮霸原陋作岐兮并幹宅會稽兮南鎮期鞏維兮北還  
顧隱然兮連王氣於永昌終歸然兮虛舊宮於大安嗚  
呼哀哉天佑聖兮恢皇綱聖成能兮返帝鄉千齡兮萬  
代山川兮鬱倉晨舉兮玉衣夕凍兮銀床惟王功兮帝

德邁地久兮天長嗚呼哀哉

啓奠祖奠遣奠行禮儀

其日行啓奠禮時前皇太后自宮中服哀服德壽宮提  
舉官奏請皇太后詣梓宮前行燒香奉寧之禮畢權歸  
幄次有司設牙床牲牢禮饌畢禮直禮官引讀祝文官  
詣殿上東向立進幣爵酒官詣殿上西向立酌酒官於  
酒尊之後立次御史台閣門太常寺分引皇太子太傅  
宰執總護使文武百僚於殿裏外隨地之宜立定次禮  
直官太常博士引太常卿於幄前立定皇帝服哀服至  
御幄即座侍衛之官各服初喪之服簾降太史局報時前二刻禮執  
官太常博士引太常卿當幄前俛伏跪奏稱太常卿臣  
某言請皇帝行啓奠之禮奏訖伏興退復位簾捲前導

皇帝出幄詣殿上褥位西向立皇帝再拜舉哭在位官  
皆再拜舉哭次內侍進槃匱沃水奏請皇帝去杖盥手  
內侍進巾奏請皇帝俛手內侍進爵奏請皇帝洗爵內  
侍進巾奏請皇帝拭爵前導官前導皇帝詣大行太上  
皇帝靈座前次禮直官引太傅後從凡升降其祖奠遣奠禮皆太傅從後  
又奏請皇帝跪上香再上香進幣爵酒官西向跪先進  
幣次進爵酒又奏請皇帝受幣奠幣執爵三祭酒奠爵  
俛伏興又奏請皇帝執杖少立哭止讀祝文官東向跪  
讀祝文官奏請皇帝哭在位官皆哭又奏請拜皇帝再  
拜在位官皆再拜訖權導皇帝權歸幄簾降前導官於  
幄前立陪位等官並權退內文武百僚合赴城外奉辭  
駕徹啟奠禮饌俟時至侍中詣大行太上皇帝靈座前

俛伏跪奏稱侍中臣某言請大行太上皇帝靈駕進發  
奏訖伏興退復位凡侍中奏請皆俛伏跪奏訖伏興俟輦官等捧梓宮

稍前侍仲中又奏請大行太上皇帝靈駕少駐俟權置

定輦官等并權退次德壽宮提舉官奏請皇太后詣梓

宮前舉哭行燒香禮奉辭之禮畢還宮有司設牙牀牲

牢禮饌畢次引皇太子太傅宰執總護使皇親南班官

行事侍中等及總護使司官屬詣殿下北向立定次禮

直官太常博士引太常卿當幄前俛伏跪奏稱太常卿

臣某言請皇帝行祖奠之禮奏訖伏興退復位簾捲前

導皇帝出幄詣殿上西向禱位立奏請拜舉哭行禮并如啟奠之議訖

前導皇帝還禱位西向立太傅宰執前導官總護使司官屬權退詣德壽宮門外

前導後立班次引皇親南班官於殿下稍東少立次引皇太

子升殿詣皇帝禱位之東西向立次引總護使升殿於

太子之後西向立禮直官引侍中奏請大行太上皇帝

靈駕進發初行祖奠之禮少府監即下輦官等升捧梓宮其所進龍輅於德壽殿

太傅持節導梓宮進發降奠太常少卿帥執罍者分左

右障梓宮初梓宮降殿皇帝舉哭從行皇太子總護使

皇親南班官并舉哭陪從至德壽宮次引侍中詣太行

太上皇帝靈駕前奏稱侍中臣某言請大行太上皇帝

梓宮升龍輅奏訖退次將作監捧梓宮登龍輅挽士奉

引至德壽殿次引侍中詣大行太上皇帝靈駕前奏稱

侍中臣某言請大行太上皇帝梓宮升龍輅奏訖退次

將作監捧梓宮登龍輅挽士奉引至德壽宮門外侍中

奏請大行太上皇帝靈駕權駐升大昇輦初至宮門外

皇帝歸幄簾降皇太子行事陪從官少退前導官立於御幄前次少傅率梓宮官作監將奉梓宮升大昇舉訖有司設哀用牙床寔牲牢禮饌畢次引讀冊舉冊進幣爵酒官各隨地之宜立酌酒官於酒尊之後立次引皇太子宰執總護使等陪位官皆立定陪位官如次禮直官太常博士引太常卿當幄前俛伏跪奏稱太常卿臣某言請皇帝行遣奠之禮奏訖伏興退復位簾捲前導皇帝出幄詣大昇舉之前褥位立奏請拜皇帝再拜舉哭在位官皆再拜舉哭次內侍進槃匱沃水奏請皇帝去杖盥手內侍進巾奏請皇帝悅手內侍進爵奏請皇帝洗爵內侍進巾奏請皇帝拭爵前導官前導皇帝詣大行太上皇帝靈駕前又奏請皇帝跪上香再上香

三上香進幣爵酒官跪先進幣次進爵酒又奏請皇帝受幣奠幣執爵三祭酒奠爵俛伏興又奏請皇帝執杖少立哭止讀哀冊官跪讀哀冊訖奏請皇帝哭在位官皆哭又奏請拜皇帝再拜在位官皆再拜訖陪位官皆退有司徹牙床禮饌前導皇帝靈駕進發有司官引侍中奏請大行太上皇帝靈駕進發有司率僧道各執威儀鑼鈸道具并應車舉法物哀冊謚冊寶等及儀衛執儀物人前引大行太上皇帝靈駕發引前導皇帝出幄舉哭執綵繩俟大昇舉進發內侍官割繩訖前導皇帝歸幄哭止簾降前導官退皇帝釋哀服服折上巾白袍黑銀帶以俟還內如來儀

百官奉辭儀

其日百僚先赴城外幕次服初喪之服有司先設香案  
俟大行太上皇帝靈駕將至御史台閤門太常寺集百  
官立定禮直官引班首已下詣班前立定俟靈駕至禮  
直官贊躬拜班首已下在位官皆再拜次引班首詣香  
再上香三上香復位立班首舉哭在位官皆舉哭俟哭  
止禮直官贊躬拜在位官皆再拜奉辭俟大昇舉過並  
退以俟奉慰

奉迎虞主日百僚並帝服黑帶班首稽笏上香如儀唯不舉哭

中興禮書續編第六十五卷

凶禮三十一

永思陵三十一

遷奠掩櫬宮

淳熙十四年十一月二十二日禮部太常寺言勘會將  
來梓宮發引依故例合差禮部太常寺官等充掩櫬宮  
行事官俟掩櫬宮畢回程入門計會閤門朝見詔依  
十五年二月二十四日禮部太常寺言將來掩櫬宮今  
參酌典禮條具下項 一遷奠行禮官一員依禮例乞  
降勅差總護使 一遷奠并掩櫬宮各合差奉禮郎太  
祝太官令各一員并乞輪差隨從梓宮太常寺官如職  
事相妨乞報總護使司於屬官內差充 一合差內謁

者一員浴虞主并奏請神靈上虞主并合差捧腰輿內侍官四員扶持二員夾侍二員并兼安奉虞主祇應並乞下入內內侍省差官施行一依典禮掩橫官日總護使率應在橫官官進表奉慰所有今來掩橫官日欲乞依典禮總護使率應在梓宮官進表牋奉慰皇太后皇帝皇后一梓宮發引至橫宮依禮例掩橫官前一日合行奏告昭慈聖憲皇后橫宮徽宗皇帝橫宮顯恭皇后御容顯肅皇后橫宮顯仁皇后橫宮懿節皇后橫宮其奏告官乞依例下大宗正司差紹興府宗室六員及下紹興府差太祝六員於奏告前一日赴太寧寺致齋所有合用御封香祝文乞從太常寺依例具合用數關報所屬預先請降付兩橫官司交割至日行禮使用并合用供

養食茶酒果等物件乞令紹興府依自來奏告禮例排

辦施行

一合用祝文二首

一首述以遷奠之意一首述以掩橫宮之意

一合用御封真香二合

一合用白幣二段

各長一丈八尺小尺

乞令大府寺行下左藏庫支供一遷奠并掩橫宮合

用羊豕各二口及合用香料酒齊并藉祭器席及行事

官等合用幕次什物燈燭拜席褥等并依例從太常寺

具合用數牒報紹興府收買排辦及差衙前二人專一

催促應辦并依紹興二十九年禮例合用裝載御封香

御書祝文并禮料酒齊祭器等船三隻乞下兩浙轉運

司前期差撥所有梓梢往回合破錢米亦乞令支費所

比附支破施行一依故例橫宮合用梓宮待時幄次

照得紹興十二年二十九年禮例梓宮至橫宮捧升獻

殿權安奉以俟遷奠掩橫宮所有今來梓宮發引至橫宮欲乞依上件禮例捧梓宮升獻殿權安奉以俟遷奠掩橫宮 一安奉虞主乞於橫宮獻殿上安奉次行虞祭禮所有安奉椅卓乞依例令主管諸司排辦 一合用香爐匙合炭火等乞依例下主管諸司排辦 一遷奠掩橫宮行禮儀注乞依禮例從太常寺修定關報施行詔依

三十日禮部太常寺言按禮經重主道也鄭氏注云始死未作主以重主其神也重既虞而埋之乃後作主又云周主重徹焉周人作主重埋之本廟司馬光云焚重於板橋非禮也且古者祭器敝猶埋之不敢焚以神之所依故也况重有主道乎檢照昨徽宗皇帝埋重於報

恩觀欽宗皇帝埋重於招賢寺所有今來大行太上皇帝埋重靈座殿前所立重欲乞依典禮俟將來梓宮發引日捧擎至橫宮令太史局官預期指引利方令修奉司差人開掘至掩橫宮日隨時埋之庶不違禮典詔依三月一日禮部太常寺言將來掩橫宮今條具下條一發引日其方相買道輿等除綵結物色外其餘大昇輦方相買道輿等候至橫宮於掩橫宮前一日令太史局於引橫宮外利方令主管一行事務差人監勒喪奠作頭焚燒 一銘旌黝纁贈玉依故事并合入皇堂安設 一依典禮將來掩橫宮時行在文武百僚合進名奉慰今欲乞是日先詣德壽宮進名奉慰皇太后次詣文德殿門外進名奉慰皇帝皇后仍乞是日百司作休



務假一日所有合差定時刻尅擇官一名乞下太史局  
差撥施行 一勘會已降指揮節文將來大行太上皇  
帝梓宮掩橫日迎奉懿節皇后御容於大行太上皇帝  
下宮後殿安奉依禮例合行奏告昭慈聖憲皇后御容  
并徽宗皇帝顯恭皇后顯肅皇后顯仁皇后懿節皇后  
御容 一奏告合用祝文六首 述以為大行太上皇帝梓宮掩橫日告遷迎奉  
懿節皇后御容詣大行太上皇帝 帝下宮後殿安奉奏告之意 乞下學士院修撰書寫  
進書訖計會入內內侍省所差降香人一就齋降前去  
紹興府橫官司交割施行 一奏告合用御封降真香  
七合 六合奏告下宮供燒一合 乞令入內內侍省預先  
請降 一奏告合用牙盤食茶酒果等并合差太祝四  
員并乞令紹興府依自來奏告例差官并禮生及衙前

排辦施行所有合差奏告官四員乞依例差修奉使司  
官奏告行禮其行事日乞於掩橫宮日先行奏告禮畢  
告遷懿節皇后御容於大行太上皇帝下宮後殿奉安  
其告遷安奉乞令本宮都監捧遷安奉行燒香之禮  
一俟將來掩橫官畢乞依禮例差太常少卿迎奉大行  
上太皇帝御容詣下宮前殿行奉安燒香之禮所有合  
用祝文一首 述以為掩橫官畢迎奉大行太上皇帝御容詣下宮前殿奉安之意 并合用  
御封降真香一合乞令入內內侍省請降仍令入內  
內侍省差人齋上件祝文御香降附紹興府掩橫官司  
交割其合用供養牙盤食茶果酒器皿香案香爐匙合  
奠茶酒鈔鑪盆臺辦席褥等并乞下紹興府委官及差  
衙前專一計會本宮排辦施行詔依

十六日禮部太常寺言勘會三月三十日聖神武文憲  
孝皇帝梓宮掩攢宮太傅以下行監掩攢宮神武文憲  
及奉辭次詣兩攢宮朝拜并拜進慰表牋畢除太常卿  
以下虞祭行禮官及奉神帛官所所有太傅總護使以  
下行事官即便回程詔依  
十八日右丞相周必大等言準省劄備坐已降指揮三  
月三十日聖神武文憲孝皇帝梓宮掩攢宮畢所有太  
攝傅總護使以下行事官即便回程臣等檢照本朝故  
事山陵等五使係隨神主還京紹興十二年徽宗掩攢  
之時緣紹興七年先已立虞主祔廟總護使以下所有  
徑赴行在至紹興二十九年顯仁皇后攢掩攢誤用紹  
興十二年變禮今來聖神武文憲孝皇帝神主在塗事

體例不輕臣等欲參酌典故導從渡江比之徑回止爭  
三日餘行事官自遵已降指揮先回於義為允詔依  
二十三日權禮部郎官倪思等言竊惟聖神武文憲孝  
皇帝靈駕發引 抵攢宮自今來距掩攢之日猶有旬  
浹仰惟聖情追念皇皇何以堪處是以常服未忍即御  
今欲乞未掩攢以前除宰執內殿奏事外所有百官輪  
對引見班次具與暫停俟掩攢畢日仍舊庶几仰稱聖  
上孝思哀切之誠詔依

二十五日總護使司劄子太常寺申准右丞相參知政  
事劄子監掩攢宮監察御史吳博古申恭覩聖神武文  
憲孝皇帝梓宮掩攢在近凡屬臣子誰不痛心欲乞行  
下諸使諸司府縣各率其屬於掩攢前三日并令齋素

除薦獻外仍乞嚴立榜賞禁止屠宰少盡臣子哀慕之情伏乞嚴賜施行申聞事右劄送禮部尚書省太常少卿日下議定闕報總護使司及合屬去處照會施行禮部太常寺今議定除橫宮薦獻外自三月二十八日二十九日三十日禁止屠宰三日本寺除已牒紹興府禁止施行外伏乞照會施行申聞事

### 遷奠掩橫宮

其日俟大昇舉前俛伏至橫宮侍中詣大昇舉前俛伏跪奏稱侍中臣某言請靈駕降舉升龍輜詣獻殿奏訖俛伏興有司捧梓宮升龍輜入獻殿訖俛掩橫日時前行遷奠禮俟有司於梓宮前陳設牙床祭器禮饌畢引太傅以下行事陪位官詣殿下北向立班定奉禮郎太

祝太官令又於其後立引行禮總護使詣西向立贊躬拜在位官皆再拜舉哭次引奉禮郎太祝太官令升殿就位立定次引總護使詣盥洗位盥手俛手洗爵拭爵詣酒尊所跪執爵太官令酌酒訖興詣梓宮前跪三上香奠幣三祭酒俛伏興少立哭止太祝讀祝文訖總護使再拜舉哭在位官皆舉哭總護使復位再拜在位官皆再拜訖哭止并權退俟掩橫時至引侍中詣梓宮前請奏聖神武文憲孝皇帝靈駕赴橫宮奏訖退有司捧梓宮即橫宮權退俟梓宮進皇堂訖次引將作監掩橫宮太傅監察御史並監視掩橫宮次少保復土九鍾訖太史奏請靈上神帛初行掩橫宮內謁書之並權退俟有司陳設牙床祭器禮饌訖引太常卿奉禮郎太祝

太官令再詣攢殿下立班行掩攢宮饗禮如遣奠之儀

唯不用陪位官禮儀使奉迎聖神武文憲孝皇帝御容詣下宮

殿前行奉安之禮如儀內不係隨從虞主等官俟太常

卿行饗禮畢並請攢殿下奉辭先兩拜舉哭俟哭止又

兩拜訖退並易常服吉帶次右丞相率應合赴朝拜官


詣昭慈聖憲皇后攢宮永祐陵攢宮朝拜訖退易常服

黑帶詣太寧寺立班望闕再拜進表牋奉慰訖退

初行

畢內謁奉虞主詣獻次五使太常卿並詣永思陵攢殿

殿上安奉于座下立班太常卿行虞祭之禮如別儀



程

